

ካስ ‘ህያብ ሕርየት’ ምን አቅሊም ግ/በ/ቀየሕ አቅሊም ግብለት ትሰለመዩ

ዲብ ዮም 24 አፕሪል ምን መዲኒት ነቅፈ. ለትብግስ ካስ ህያብ ሕርየት ናይ አቃሊም ቅብለት ወግብለት በሐር ቀየሕ ዝያረቱ እንዴ አትመመ፡ ዲብ ሰቦ ማዮ አቅሊም ግብለት ትሰለመዩ።

ካስ ህያብ ሕርየት እብ ሓክም አቅሊም ግብለት በሐር ቀየሕ ሰፊር መሐመድሰዒድ መንታይ ለብእቶም ሰብ ሰልጠት ናይለ አቅሊም እንዴ ተ’ሉ፡ 125 ኪሎሜተር እብ ገበይ ጽርግዩ እግሉ፡ ፎር እንዴ ሄረረ፡ ዲብ ታሪካይ አሳር ለብእተ ቆሓይቶ ክም በጽሑ፡ ሓክም አቅሊም ግብለት አሰይድ ሀብተኣብ ተሰፋጽዮን ለብእቶም ሰብ ሰልጠት አቅሊም ግብለት ሽዑብ ምዴርየት ዐዲ ቀይሕ ወእንፋር ቅዋት ድፈዕ ከብቱ ናይረት ወደው እግሉ።

ዲብ ምን ሳብዓይ ክፈል ዘመን ቀደም ተውሊደት ነብዩለ ዲሰ ለለኣነብት አሳር ቀዳም ለብእተ፡ ናይ ብለቅ አርሳም፡ ጀምዐ፡ ናይ ዘበን በዲር ከዋን ወብዕድ ለክምክም ዝያድ 750 አሳር ለብእተ ቆሓይቶ፡ ዲብ ጉብኣት መናሰበት፡ ሰፊር መሐመድሰዒድ መንታይ እግሉ ምን ሰዋትር ነቅፈ.

ወድሕቱም ለትነሰአ ህያብ ሕርየት ለጸብጠ ካስ እግል ሓክም አቅሊም ግብለት ሰለመዩ።

ዲብ ናይረት ናይ ሰለሞት ከብቱ ሓክም አቅሊም ግብለት አሰይድ ሀብተኣብ ተሰፋጽዮን እተ አሰመዐዩ ከሊመት፡ ካስ ህያብ ሕርየት ናይ አቃሊም ቅብለት ወግብለት በሐር ቀየሕ ዝያረቱ፡ እንዴ አትመመ ዲብ ታሪካይ አሳር ለብእተ ቆሓይቶ መትሳላሙ ተርጀመት ዐባይ ክም ቡ እት ወድሕ፡ ሕሸምት ትርበት ለብእቱ ካስ እግል ንትከበት ሐበን ልሰመዐን” ቤለ።

ካስ ህያብ ሕርየት ምን ቆሓይቶ አሰክ ለብዕድ አማክን አቅሊም ግብለት ሄራሩ ዲብ ለአተላሊ፡ ዐዲቀይሕ ዲብ በጽሑ ዲብ ወክድ፡ ሽዑብ፡ ዲብ፡ ወደረሰ እብ ናይረት ገበይ እብ አሴራር ልትከቡቱ ዲብ ህለው፡ ሓክም አቅሊም ግብለት እግል ሙዲር ምዴርየት ዐዲ ቀይሕ አሰይድ ሀብታይ ተሰፋዝጊ ሰለመዩ።

ሐቆ እሊ ምን መዲኒት ዐዲ ቀይሕ አሰክ ሰንዐፊ እተ ሄረረ እቱ ወክድ፡ ዲብ ከዋ ለህለ ደገጊት



ተለወ ዲብ ህለው፡ ሽዑብ መዲኒት ሰንዐፊ ምስል ፍራስ ቅዋት ድፈዕ ናይረት ከብቱ ወደው እግሉ።

እተ መናሰበት ከብቱ ህዩ፡ ምዴር ምዴርየት ዐዲ ቀይሕ እግል ምዴር ምዴርየት ሰንዐፊ አሰይድ

እድረሰ ዐሊ ሸከር ክም ሰለመዩ፡ ዲብ ሳብዓይ ክፈል ዘመን ለተአሰሰ አሳር በዲር ለብእቱ ባካት መጠረ ወበለው ከለው እንዴ ተዐርረ ዲብ እት መደት ሳልሳይ ወራር ወያኔ ደማር ትርድት ለሳደፈተ እት ባካት

ሕዱድ አቶብዩ ለህሌት መዲኒት ሰርሐ በጽሑ።

ካስ “ህያብ ሕርየት” ማሌ ለህ ሄራሩ አሰክ ምዴርየት ጸርነ፡ ማይዐይኒ ወሰዝይቲ እትሉሉይ ህለ።

መድረሰት እስብዳልየት ዐስከርየት ግላስ 166 ሴድየት ኔርስ ተአድሕር



ዲብ መድረሰት ሴድየት ኔርስ እስብዳልየት ዐስከርየት ግላስ ውዛረት ድፈዕ፡ እግል ሰነት ወሰር እብ ምህነት ሴድየት ኔርስ ለደርሰው 84 አዋልድ አንሳት ለብእቶም 166 አንፋር 33 ደውረት ክድመት ወጠን እብ ሸሃደት ደሐረው።

ሙዲርለ መድረሰት መምህር ገብረብርሃን ሃብተገርጊሽ ዲብ ቀደመዩ ከሊመት፡ ለመድረሰት፡ አተላላይ ናይለ ዲብ ሐንቱ ውዛረት ዓፍየት ለሸቄ መዳርስ ሴድየት ኔርስ ክምተ እንዴ አሸረ፡ ውዛረት ዓፍየት እግል ደርስ ለገብእ መሻቀዩ ዲብ አዳላይ፡ መዳርስ ሴድየት ኔርስ

ጊንደሪ፡ መንደራረ ወባርንቶ ህዩ እብ ፍዕል ወነዘር እግል ወደወ እሎም መትሰዳዳይ ሐመደ።

ወኪል መድሕረት እብ ጀሀቱ፡ እብ ደሐረው እብ መጃል ተዕሊም ሕክምነ፡ እግል ሸዕም እብ መትሰባል እግል ልክደም ለዐምቱ መዳሊት እንዴ አከደ፡ ለተአሂል እግል ልሰርገል እግል ትጸገመው፡ ጀሃት ወእብ ሕሰር ለከድመው መምህራን ህዩ ሐመደ።

መዲካል ዳይሬክተር እስብዳልየት ግላስ ሌተናል ኮሎኔል ዶ/ር አርአየ ተክለሃይማኖት ህዩ፡ መድሕረት ድራሱቶም ዲብ ሰነት

2022 እግል ለአትምሞ ምንመ ዐለ እሎም፡ እብ ለትፈናተ አሰባብ ክምሰል ደንገረው፡ ምናተ ለወቅት ደረሰ ዝያደት እግል ልትመራመሮ ወፈህምም እግል ልወቅሎ ክምሰል ሰደዮም እንዴ ሐበረ፡ ምህነት መጃል ዓፍየት ክቡድ ወመስኦልየት ለለአረፈዕ፡ መድሕረት እብ ደሚር እግል ልክደም ትፋኑ።

መድረሰት ሴድየት ኔርስ እስብዳልየት ዐስከርየት ግላስ፡ ውዛረት ድፈዕ፡ ምን ሰነት 2013 እንዴ አሰተብዴት ዲብ አርበዕ ኮርሳት 188 አዋልድ አንሳት ለብእቶም 354 ደረሰ አድሐረት።

ዴለበርዕድ፡ ሳምን ደረሰ ገብኣት

ዲብ ምዴርየት ዴለበርዕድ፡ ዝያድ 500 ደረሰ ለአሻረከ፡ ወራታት ዓዳት፡ ዓፍየት ወርያደት ለክምክመ ሳምን ደረሰ፡ ምን ዮም 5 አሰክ ዮም 7 ማዮ እብ ነያረት ትሰርገሉ።

እሊ እግል ኩለን መዳርስ ለአሻረከ ሳምን፡ ጅግራታት ኮበሪት እገር፡ ቦሊቦል፡ አትሌቲክስ፡ ማዕሉማት ዓም ጀልሰት ክምሰልሁመ ዕፌ ዓዳት ለክምክመ ዐለ።

እትለ ገብኣት ናይ መድብኢ ዓደት ከሊመት ለአሰመዐ መስኦል በራምጅ ዓዳት፡ ርያደት ወዓፍየት ናይለ ምዴርየት መምህር ዮሀንስ መብራህቶም፡ ናይ ዮም ዓመት ሳምን ደረሰ ምንለ ሐልፈ ፍንቱይ ለወድዩ፡ አሳስ እጅትማዲ ሰበት ጸብጠ ክምቱ ሐቆለ ሐበረ፡ ኩለን መዳርስ እብ ስታት እንዴ ልትመርሐ ዲብ ፍዕል ለረከዘ ፍገሪት ዲብ ሰጃሎት ሲኒ ልሄረ ክም ህለዩ አብርሀ።

ጅግራታት ርያደት ወዓዳት፡ ዲብ አክዶት በቃዐት ተዕሊም ለቡ ሐዘት ቀላል ክም ኢኮን እንዴ ሸርሐ ህዩ፡ ልሰዕ ለኢትፈተሽት መቅደረት ደረሰ ሰበት ህሌት መዳርስ እብ ለትደቀብ እግል ልክደም ተሐሰበ።

ምዲር ምዴርየት ዴለበርዕድ አሰይድ መሐረን ተክለኣብ እብ ጀሀቱ፡ ሳምን ርያደት ወዓዳት ደረሰ አሳስ እጅትማዲ ሰበት ጸብጠ ሰርገል-ዐቢ ክምቱ ሐቆለ ሐበረ፡ እግል ኩሎም ጀሀት መንዝመት ወመመቅርሐት ሐመደ።

ዲብ ደንገበ መስኦል ፈሬዕ ተዕሊም ምዴርየት ዐንሰበ መምህር ክፍላይ ዐንዴሚካኤል፡ ዲብ ኩለን ምዴርየት እብ ለትነዘመ ለገብእ ወራታት ዓዳት፡ ርያደት ወዓፍየት፡ መቅደረት ደረሰ ዲብ ፈተሾት ወአትአመሮት ለቡ ዶር እብ ቀለል ክም ኢልትርኡ እንዴ ሐበረ፡ ለሐሰ ተጃርብ ርኩብ ምኑ ክም ህለ አፍህመ።

ዲብ ደንገብ፡ እትለ ገብኣ ጅግራታት እብ ብሕተ ወእብ ፍረቅ ለትዐወተው ጀዋእዝ ተህዩ።

(2ይ ወናይ ደንበክ ክፋል)

ሰአል- ክምሰለ ለትሽርሒ ሓለት ሶዳን እብ ኩለን ድወል መንጠቀት ቀር-አፍሪቅ ውብዕዳት እት ባኩን ለህለዩ ድወል ግዋሬ ሶዳን እብ ለትፈናተ ደረጃት እግል ትትሸረሕ ለትቀድር ተረት በን። እትሊ ሐርብ ገብእ ዲቡ ለህለ ወቅትሙ ጅህድ ወእህትማም ሶዳንደን ዲብ ክላፋት ወባልሑቱ አህምየት ዐባይ ሰበት ቡ። ናይ ሕበር ፈህም ህለ ገብእ፤ እግል አርህየትላ ክላፋት ክምኩም ወለለደሚዕ ጅህድ እብ ደረጃት መንጠቀት ሚህለ፤ ክምሰሉህመ ናይ ቢ መትኣታይ ወጅህድ ዲብ አብጠርትላ ገብእ ለህለ ሐርብ ሕድ ሚተረት እግል ተህሌ እግሉ ትቀድር፤

በሊሱ፡ “ክል-ዶል ቀድያት መንጠቀት እንዴ እምቤ ንትሃኒ እንዴ ህሌ፡ ናይለ መንጠቀት ናይ ሕበር መትከምካም፡ መዓወነት፡ አታማም እግል ኖሰ-ኖሰኩ፡ ወናይ ወናይለ መንጠቀት ቅወት ሕበር እግል ተህሌቡ፡ እትለ እነብር ዲብ ለህሌነ መንጠቀት ክል ዱለትክ በነ እግል ትምበር ትቀድር ሐቲመ ምሽክለት አለቡ። ምናተ ክል ዶል በደል መንበረት እብ በደን፡ ለሐሰት ወለተሐሬ ለናይ ሕበር መንበረት ተ። መትከምካም ናይ ሐቲ መንጠቀት ልትበህል እንዴ ሆሉ፡ አህምየተ ወመሰለሐተ እግል ለገብአት ትግባእ ጀህት ዋደሐትተ። ሽፊሐመ ለለአትሐዘዩ ኢኮን። እሊ ሰበት ገብእ ዲብ ናይለ መንጠቀት መሻክል፡ ክላፋት ወአከይ-መቅሬሕ እግል ባልሑት ወአርህየት፡ አውመ ምን መታክሉ ወመሻክሉ ክም እንዳፌዕ ለተአቀድረነ ሐለት ሕበር እግል ንክለቅ ብኸ። መሰለን ቅድየት ሶላም እተ ለመጽአት ዲቡ ወቅት፡ እበ ናይለ ወቅት ለህይ ሕነ በደነ ናይነ መብዳኡ፡ ናይ ኖሰነ ረአይ፡ ናይ ብሕተ ምስዳራት ወመባደራት እግል ለህሌ እግልነ ቀድር ላኪን፡ ለዲብ መንጠቀት ለህለው ሰብ ሽርከትነ አውመ መትሻቂት፡ ክል መኒናክ ሐድ ሐለትነ ኒዴ ወእሊ ዲብ ሕድ እንዴ ተአከበ ናይ ሕበር ቅወት፡ ሐለት ወደቅብ፡ ዲብ ባልሑት ለገብእ ክላፋት ለተህሌ እግሉ ተረት ዐባይተ። ከእለ ናይ መንጠቀት ሐለት እምብለ ለህሌነ ቅወት እግል ተህሌ፡ እት

ፍንጌ ኖሰ-ኖሰነ መዓወት እግል ተህሌ ወዲብ ደንበክ ህዩ ለእብ በን-በን ለወዲነ መሻረከት ዲብ ሕድ እንዴ ተአከበት ሐቲ ቅወት ዐባይ ለክልቅ በሰር፡ ገበይ እግል ነአዋፊሕ እግሉ፡ እት ፍንጌነ ደማነት ሕድ እግል ተህሌ፡ ናይ ሕበር ፈህም ወመብዳእ ሳብት እግል ንክለቅ ሰበት ሰዴኑ፡ ለዲብ ሶማል ለገብአት ጀርቤ ክም መሰል ቀላል ወኒኢሽ ኢኮን። ዲብ ሰነት 2006 ዲብ ሶማል መትኣታይ ቅዋት ካርጅ ሐዲስ ወወራር ርስሚ እተ ለገብእ ዲቡ ወቅት፡ ሀለዮትለ ናይ እለ መንጠቀትነ ለትትበህል መንዘመት ኢጋድ ዲብ ሸክ ሰበት አተ፡ እተ መንዘመት ለዐለት እግልነ ዕድወየት እግል ዶሉ አብጠርናሁ። መንዘመት ኢጋድ መንዘመት ዐቦት እቅትሳድ እለ መንጠቀት እንዴ ኢትገብእ፡ ቀደሚሁ መንዘመት መዳፈዐት ጀሐር ወአምበጠ ለዐለ። ሐቆ ሰነት 1991 ሐርብ ብፋድ ሐቆለ አክተመ ላኪን፡ እትለ መንጠቀት ሰአአየት ለለህይብ ተየልል ሰበት ሀሌ፡ እለ መንዘመት እለ ዲብ መንዘመት መዓወነት ዐቦት እቅትሳድ እለ መንጠቀት አፎ ኢእንቀደረ እንዴ እምቤ ምስል አንፋርለ መንዘመት ለዐለዩ ድወል ወጀሃት ትጋሚ። ለምህም ሀደፍ መንዘመት ኢጋድ ህዩ፡ እግል መስተቅበል፡ እት ፍንጌለ ዲብ መንጠቀት ለህለዩ ድወል፡ ሽርከት፡ መቅሬሕ ወውፋቅ ወገማት ሕድ ሌጠ እንዴ ኢገብእ፡ ናይ ሕበር ውሕደት ወመዓወነት ዲብ ሸቅል ዐማር ሕበር፡ እግል ለህሌቡ ክምቡ፡ የምክን ክል መኒናክ ናይ ኖሰነ በርናምጃት ዐማር እግል ነአፍግር እንቀድር። ለናይ ሕበር ክእልልት ፍገራት በርናምጃት ዐማርነ ላኪን፡ ምነ እብ በን-በን ለእንወድዩ ለትደቀበ ወለዐበ ሰበት ገብእ፡ ዲብ አተረዶት እለ መንዘመት እለ ጅህድነ እግል ነአደቅብ ክም ብናቱ ለዐበ ሀደፍ አንፋርለ መንዘመት መንጠቀት።

ለእግል ንብጽሐ ለነሐዜ ሃዳፍ ህዩ ሐቲ እብ ሐቲ እግል ልትወደሕ ቡ። እሊ ህዩ መንዘመት ኢጋድ በነ እንዴ ኢትገብእ፡ እምበሌሃመ መንዘመት ኮሚሱ፡ መንዘመት ሲንሳድ ወብዕዳት መንዘማት እለ ለእንበር ዲብ መንጠቀት ህለዩ። እሊ መዝማት እሊ

ለሀደፋ ሚቲ፤ ለሀደፍ ዐማር ሌጣቲ። እሊ ለህለ እግልነ እቅትሳድ ምን እሊ ለህለዩ ምን እዴ እት አፍ እንዴ አባረ ወትባልሐ፡ ዲብ ለትጠወረ እቅትሳድ ሰናዐት ወሸራከት መካሰብ ሕበር እግል ልትዐዴቡ። ለህለ እግሉ አርዛቅ ዕቁር እግል ለሐንፍል ወልጠውር ወጅቡ። እት ፍንጌለ ድወለ መንዘመት ዲብ ለትፈናተ ከደማት ናይ ሕበር መዓወነት እግል ተህሌቡ። ናይ አርዛቅ ከህረቡት፡ ማይ፡ ሓርሱ፡ ዓፍየት፡ ታዕሊም ውብዕድ፡ በን-በን እንዴ ይእንገብእ እብ ሕበር እግል ንሸቁ ዲቡ ለአስትህለኑ። አርዝቅነ እንዴ በርበርነ ለናይ ዐማር ብንዩት ትሕትየት እንዴ አትሐኢሲነ ዲብ ለሐሰት ደረጃት እተይ ወዐቦት ዐማር እቅትሳድ እግል ነብጽሐ ብኸ። ተፋሲል እሊ ጋር እሊ መክለሲ አለቡ። ዲብ ደንበክ ለሀደፍ ዲብ ሕድ እንዴ ሐየብናሁ ረኤናሁ ምን ገብእ ዐማር ሕበር በህለት። ናይ ለገብአት ትግባ ዱለት ሸቅል ዐማር እብ በደን እግል ለአድሚዕ ሰበት ኢቀድር፡ ምስል እሊ ለህለ ሄራር ዐለም፡ ዲብ መንጠቀትና እሊ ለመሰል ዐገል በርሰ ሸቅል ሕበር እግል ለህሌ ቡ። ለናይ ደንበክ ሀደፍ እሊ መትከምካም እሊ፡ ዐማር፡ አምን፡ ሰነብት፡ መንገፎ ወደሐን ገብእ እንዴ ሀሌ፡ ለህለ እግልነ መታክል እብ ከአፎ ክም እንሸንኩም ወለህለ እግልነ መሻክል ነአርሄ እግል ንሕሰብ ለአስትህለኑ። በደል በን-በነ መሻክልነ እግል ንባሌሕ እንጀርብ፡ እብ ሕበር ለህለ እግልነ መሻክልነ ወክላፋትነ ለነአርሄቡ አብሳር ወመባድእ እግል ለህሌ እግልና ክምቡ ለለአትክሕድ ኢኮን። እሊ ህዩ ምን ወቅት ዲብ ወቅት እንዴ ነአደቅቡ ወነአተርዱ ገጽነ ቀደም እግል ነሄርር ልትጠለብ መኒ። ለህለ እግልነ መሻክል ወመታክል ግራነ እንዴ ሐደግነ ረአሰነ ቀደም እግል ተአተሳድረነ ለትቀድር ሰለል እግል ነአዋፊሕ፡ መሻክልነ ኖሰነ ለነአርሄቡ አብሳር ወመቅደረት እግል ለህሌ እግልነ፡ ክምሰል እሊ አዜ ዲብ ሶዳን ልትረኤ ለህለ በህለት። ዲብ ናይ ግብለት ሶዳን መሳክል ለዐለ ዲቡ ወቅት ለዐለ እግልነ መብዳእ ሳብት ወለአፊናህ መሻረከት ሽፊሕ ኢለአትሐዘዩ። ለረአይነ ህዩ እትሊ እብሉ ለጸናሕቡ ናይ መንጠቀት መትከምካም፡ አፍካር ሕበር፡ ወሸቅል ምስል ለትከምካም ዐለ። ከእትሊ እንርእዩ ለህሌነ ለገብአት ቃረት ወመንዘመት እግል ትትሐሰር ዲቡ ትቀድር። ለገብአት ዱለትመ እብ በነ ምስዳራት ወመባደራት እግል ትንሳእ ትቀድር። ምናተ ሕነ እብ ጀህትነ ለቀለት ወተአዴሚዕ ለእምብሉ፡ መትሐሳር ወመትበጋሰ ናይለ መንዘመት እለ መንጠቀት እለ በህለት ኢጋድ፡ ዲብ እሊ ልትረኤ ለህለ ሐርብ ሕድ ሶዳን እብ መንዘመት ኢጋድ ለትነሰእ፡ እግል ሓል ዳይም ክላፋት ሶዳን ለአመመ ለለአትናይ መባደራት ሀለ።

እምበል እሊመ ዲብ ሶዳን ቅወት ውሕደት ሰላሰየት ለትትበህል ህሌት። በህለት መንዘመት ድወል ሐብራት፡



መንዘመት እተሓድ አፍሪቅዩ ወመንዘመት ኢጋድ በህለት። እለ ውሕደት እለ ከአፎ ወሚዶል ተአሰሰት፡ ሚትሸቁ፤ ሃዳፊ ሚቲ፤ እብ ተአኪድ ሚወሚ ዕልም ወሀደፍ ክምብ ዲብ ታሕሊላት እግል ንእቲ ኢነሐዜ ላኪን፡ ዲብ ደንበክ እለ ቅድየት እለ ምለዐል ለገብአት ትግባእ ቅወት ወሐለት፡ እግሉ ናይ መንጠቀት መንዘመት ኢጋድተ ለትከሰሱ። መቅደረት ባ ሚ አለበ ወሚእግል ቲዴ ክም ትቀድር አርእሰ ብዕድ። ዲብ ደንበክ ላኪን ናየ መሻረከት ወጅህድ እግል አርህየትላ ዲብ ሶዳን ለህለ ክላፋት አከይ-መቅሬሕ ተረት ዐባይ ቡ። እሊ ህዩ እትለ አዜ ክልቅት ለህሌት ምሽክለት ሶዳን ሌጠ እንዴ ኢገብእ፡ እግል ኡጋንዶ፡ ኪንዩ፡ ግብለት ሶዳን፡ አቶብዩ፡ ሶማል ጅቡቲ ወአራትርዩ ለነፌዕቲ። ምናተ ለመንዘመት ምንጠቀት ሐምቀት፡ እትለ መንጠቀት ለሳድፍ መሻክል እግል ትባሌሕ ሐለት ወመቅደረት አለበ እግል ልትበህል ቀድር። ላኪን ዲብ ሄራር ሸቅል መቅደረት እግል ተዓቤ ወትጠውርቡ። ለእትለ መርሐለት እለ እግል ባልሑት ክላፋት ሶዳን ልትረኤ ለህለ ዕፌ ላኪን፡ ለተሓመሻራቲ። አሮት ምነ ለክላፋት ለዓቤ ወለሐባልክ ለህሌ፡ መትኣታይ ቅዋት በራቲ። እብ ሀመሌ ለገብእ መትኣታይ እግል ልግባእ ቀድር። ላኪን እብ ዓኒ ወእብ አምር እግል ሐምረገት ሰላም አምን ወከሊቅ ኢአስከቦት መጅተምዓት ወድወል ለገብእ መትኣታይመ ሀለ። ምን ወምን ምን ልትበህል ኢበደ መኒ። ሐቲም ቃውያም ኢሕነ ወለትትሰተር መኒናመ አለቡ ላኪን፡ ዲብ ተፋሲሉ እግል ንእቲ ኢነሐዜ። ከእሊ ዲብ ለትፈናተ መናጥቅ ቃራት ዐለም ወባኩትነ ለልትከለቅ ክላፋት ወመትበጭባጭ ምን ከልቁ ሀለ ምን ልትበህል፡ መሻመት ለልትበህሉ ህለው፡ ጌንዘት ክል ቅድየት በህለት ቲ። ግናዘት ሐቆ መጽአት ጀመሉ። ገናይዝ እግል ልምጸአም ለልተምነው፡

ወእግል ሸማት ወከፈኖት ገናይዝ ለልትጸበር ምን ኢገብእ፡ ክል ክላፋትክ እንዴ ሞተ ዲብ ግናዘት እንዴ ኢልትቀየር እብ ከአፎ አርወሐት አዳም ክም ተአድሕን ለልትነሳእ ምስዳራት አለቡ። ክል ቅድየትክ ተአትሳውራ፡ ተአትቃርሐ፡ ትበድብደ፡ ወሐሬ ትቀትለክ ክም ሞተት ትሻምመ ወትከፍኑ፡ እሎም ክምእነ ለመሰሉ ቅዋት ህዩ መሻመት ልትበህሉ። ክምሰል እሊ ተየልል ሐቆ ትረከቤ፡ እግሎም ሸቅል ትጃረት ቲ። ክምሰሌሁ እግል ልርከቦ ለኢወድወ አለቦም። እሎም ምንቶም ምን ልትበህል ምን ዕንታትነ ለተሐበዐ ጋሪ ኢኮን። ላእ’መት አለበ ለገብእ መትኣታይ ህዩ፡ ሚእግል ለአፍሬ ቀድር፤ መሻረከቱ እግል ለዓቤ ህዩ፡ ለክሉቅ ለህለ ክላፋት ሰበቡ፡ መበገሲሁ ወሰራዩ አክል ሕድ ለአምር ገብእ፤ እግል ባልሑትለ መሻክል ለገብእ ስታት ወኤታን ራቴዕ አፍገረ ሚኢኮን፤ በደል በነ ሸቁ ምስል ብዕዳም እግል ልሸቁ ቀድረ ሚኢፋሉ፤ ለልብል ሰአላት በሊስ እግል ልርከብ ቡ። መሰለን እትለን ሰለሰ አርባዕ ሰነዋት ምን 2019 አሰክ አዜ እንርእዩ ለህሌነ ተማሲል ዐደዱ እሊቱ እግል ቲበሉ ለልትቀድር ኢኮን። ከእሊ ለመሰል መሻክል እግል እንሕራፍ ዝያደት ሰበት ለሐምርጉ ወለሐባልኩ፡ ለእግል ለአትዓፋ ለለሐዙ ወለቀድሮ ጀሃት ልግበኦ ወመትብእስት ገበይ ራትዐት እግል ልጽበጦ ቦም። ለድወለ ምንጠቀት መቅደረት አለበን ምንመ ልትባህሉ፡ እግል ባልሑትለ ዲብ ሶዳን ለህለ ክላፋት በክት እግል ልትሀየበን ቡ። ሐቆህ ተሐሚ ወተሐምድ። እሊ ሰበት ኢጸንሐ ላኪን፡ ሕነ ምን ሰነት 2006 ዕድወየትነ ምን መንዘመት ኢጋድ እግል ነአብጥር ለቀሰቤነ አሰብብ ምንመ ለዐለ፡ ምን መስኡልየትነ እግል ንሰኬ ሰበት ኢወጅብ። ለመንዘመት መንጠቀት እንዴ ትደቀበት መሻረከተ እግል ተዓቤቡ።

ዲብ ገጽ 4 ልተላሌ.....

ክል አርቡዕ ለትጠ'በዕ ጀሪደት

መዳልያይ፡-
- መሐመድ እድሪስ

ለይአውት ወአርተዖት
* ዘሀረ ዐሊ
* ፋጥነ አድም


ተለፎን፡ 121797/07121322
ፋክሱ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡ 200454

አትአመርት፡
ተለፎን፡ 125013፡ ዕ.ሰ.ቡ፡ 1284

(15^ይ ወናይ ደንጎበ ክፈል)

አልፍ ለሊ ወለሊ



ዐጁብ ላኪን እበ ፎጹ ለዐል ድርጅቱ ቀንጽ ወልታገሴ ዐለ። አቦቱ ሕይወት እት እንተ እበ እግል ወድ ወልደ ወዴት ነብረ አስክ ተላክመ መጽእ ጸንሐቱ። ምጽእ ክምሰል ቤለ ህዩ። ሽምሰአዲን ክምሰል መጽእ እንዴ ኢልታገሴ እብ ክርን ሕይሪት። “ወድ ውላድክ ለወዴኒተ ርኤ። እሊ ካይን እሊ! ወለ ኢሐራም!! ምን ቱ ገብእ ለከሸኖቹ ልትጋረፍ ገብእ!? ሐምዴ ኖስ ኢትምሰል እትክም እንዴ ኢኮን። እምብል ወልዩ አልሐሰን ረማን እንዴ ከሸነ ነብራሁ ለትትበለዕ ክሉ ክሉ ይዐለ” ትቤ ከፈጅኦትን ክርንተ ዕድዕደት ሓንቀተ እት እንተ ኢቃረጨተ።

ሽምሰአዲንመ እተ ካድሙ ኢትሐጨረ። እግለ ወድ እሶለሌ ዐጁብ እንዴ አዝመ ምኑ። “በለዕ” ጸንብኩ። ምን አየ? ሸንሀት አለብዬ” እት ደንጎበ እብ ዝጣጥ ትሓበረዩ ሽምሰ አዲን። መስኪን እግሉ እት ሐንቱ ወድ አዳም ለክድም። ቀላሉ ነሃራት። ወክብድቱ ክፋት ወዝጣጥ ተ ሐዞቱ ወመናበረቱ። ግድም ለተኣትፋግሩ ክምሰል ኢረኦ እት ድካን ከሸኖት ረማን አቱነ። ምኑ ክምሰል ልብነ ጸንብነ” ቤለ ከለኦመ እግሉም። ዐጁብመ እብ እንክሩ “አቦቶ እሊ ለሕነ በልዐናሁ ላተ ኮንዶ!? ትብሊ ህሌኪ እንዴ ኢኮን እንቲ። አክሉ ኢትከሸኒ ወአቡዬመ መምክን?” ቤለ ከትፎፈለ እግሉ። እሊ ለሰምዐት አቦቱ (ዐጁብ) ሰር ደርህም እንዴ ሀቡቱ እግለ ካድም (ተላይ) እግለ ትብከተ መክሸናይ ለወድ ወልደ ሐመደዩ እግለ ትርኤ እብ በሰር ታኬቱ።

ለክድማይ ሽምሰዲን አስክ ድካንለ ትባክ ሀረክረከ። ንሁፍ እት እንቲ ህዩ። ተለው ቤለዩ። “ሰኒ ማሰ!? መርሐቤ። ሚ ቱ አክል እሊ ምንዲ ትነህፍክ? ክምሰል አዳም አባይ መልዩ” ሐሰን በድረዲን ለዐድ ሓድር እግል ሓዚሁ ፍሩር ለዐሉ ትሰኣለ። “አይወ! እሊ ናይክ ከሸኖት ተቢክ እግለ ምሰልዩ ማጽእ ለዐለ ሕጻን አቦቱ። እምበሌህ ወእምበል ወልደ ለአቡሁ እግል ዐጁብ። ቀድሩ አለቡ እግል እርኣዩ አምጽኒ ምኑ ቲላነ” በሉ። ከትሰብስቦ እግሉ እብ ሕዩር መንፈሱ። ሐሰን በድረዲንመ እግለ እበ ማጽእ ለዐለ ዝብድዩት ክምሰል አቅመተ ናይ እሙ ክምሰልታዲ ኢትሸከከዩ። ላኪን ህቱመ መዳግሙ ክምሰል እንሰምዑ ለዐልነ ሰበት ገብኦ። ሕጃብ ፍንጌሁ ወፍንጌ ዐዱ ጋብእ ዐለ። ፍንቱይ ቀመማት እሙ

ለትአምሩ እንዴ ወደ እግሉ ሳርሐዩ።

ለካድም ክልኤ እግሩ ምን አድሕድ እት ሸፍገ ተለው ቤለ እቶም። እሙ እግል አልሐሰን እግለ ዝብድዩተ ረማን ክምሰል ከስተት እት ቀይቡበት አቱት መስኪን። ዐድ እሊ ኢኮን እት ራድኢት አሕድ ገብኦ። ምነ ቅያበ በል ክምሰል አበለት። ትትናሰር ሐቆለ ጸንሐት። ረኣየ እብ ክእኒ ሀቡቶም። “አይወ እሊ ከሸነት ለህሌት እዴ። እዴ ወልዩ ሌጣተ። እምብል ሸክ። አሰር ውላድ ርሕመ ለኢትአምር ዋልዳይት ሐቆ ህሌት ህዩ አነ ምን ርሕምዩ ኢኮን ለትወለደ። ሐሰን በደረኦዲን። ወልዩቱ! ወልዩ ወድ ሐላልዩ ቱ። ሐቱ ወአክል እሉ። ሰራይ ቀዳም ሰኔት። ኑር ዕንታት። በርሀት አፍያት። መሐበር። ሰርጎ። ሐቱ መሐደርዩ። ጼነ ቅዲት ወሰንደል። ሕጌዩ። መንባዩ ሰአዮብ ፈጅርዩ ወመሐበር ዮምዩ። እምክ ሐቆክ ሸፍር መረ እተ ወከደን። መቅሬሕ ኢኮን ወእብ ሃጃክ ገርገም” ረፍዐት ወከፊት። ላሊ ትከፈለት ሸህሪ ባር ምን መዳግመ እንዴ ኢመሸግ እግል ሰኩብ አስክ ዐራተ አትቃመተት ሸህሪ ዛድ።

ሓይሰ መልክ ክምሰል ማሌ ላሊ ዳገምናህ ለካድም እበ ረማን ክምሰል መጽእ እም ሐሰን በድረዲን እት ቅያብ ገብኦት እብ ሸደት ፈርሐት። አቡሁ ሐ አቡሁ ሽምሰዲን ህዩ አስክ ሰልጣን ድምሸቅ እንዴ ጌሱ ተዩልል ወድ ወድ ሐሁ ምን አሌፍ አስክ ያእ ዳገመዩ እግሉ። ወለ ዐለ እግሉ ውራቅ እሰባት እግሉ ሀቡዩ። አካን ህለዮቱ እት መዲነት ድምሸቅመ እት ድካን አተባክ ክምሰል ህለ ኢሰትረ ምኑ። ለመልክ አስክ ቦሊሰ ወረቀት እንዴ ነድኦ እት ሐንቱ ዐሰከር እግል ልጽነሕ አማውር

ሀቡዮም። ክምሰል አማውሩ ህዩ ትቀየደ ሐሰን በኒ ኑር አዲን። እት ቀበት ሰንዱቅ እንዴ አተዉ ህዩ አስክ መሰር ጌሰው እቡ። ሐቆ ሄራር ሳልሰ ዮም እብ ላሊህ ወአምዕለ እት መሰር በጽሐው። ሐሰን እት ሰጅን ሰንዱቅ ወእሙ ወሐ አቡሁ ወወለት አብሁ እት ቀሐት እንሰ። ዐጁብ እት ሐንበላይ ፈረሱ ወካድም መዋልያይ መግዕዳይ ወመርትዓይ ገበዮም።

እብሊ ሰበት እሊ እት ሸፍር ገእ አበለው። እግለ እግሉ ግሉቡግም ለዐለው ሐሰን በድረዲን እንዴ አፍገረዩ እግል ልትሃጀኩ አስተብደ ሐ አብሁ ሽምሰዲን። “አነ አምርዩ ህሌክ”? ትሰለ ሽምሰዲን። “ኢኮን” በልሰ ወድ ሐ አልሐሰን። አቡክ ሐ አቡክ አነ ሽምሰዲን እትበህል። “ሐቱ ዶል ለአምጽአተክ ይእንደሌ እት ሸፍርነ እንዴ ትመዩክ ፍጅራተ ደአሰበሐክ ምሰልነ። እበ ለምሰል ሕጺትክ ለዐለት እብ ቆልዩ ስቲ ሐሰን ሕነት ዐቅረት ምንከ። ላመ ትሐነሽ ሕጻን እት እንቲ ትወለደ። እብ ፈድል ረቢ ወበርከት አብዕቡ ወአብዕብክ ህዩ ህቱመ እናሰ ሸንጉ ገብኦ ወእብ አብሁ እት ልትሰኣል ሸፍር አምረረ እትነ። እግል ሓዚክ ህዩ አነ ወህቱ ወስቲ ሐሰን አስክ አልበሰረ ሳፈርነ። እምካመ ሓለተ ወመዳግመ ሰኒ ኬልም ቱ ለህለ። ላመ እንታቱ እንቤ እበ ለፍንጌክ ወፍንጌለ ያሁዱ ለዐለ ፈርማት ወለ እብ ከጥ አቡክ ሐቱ ኑርኦዲን ለትከተብ ሕፍዝ ነሰብክ ወሐሰብክ ወወጠንክ ላላሊ እሊ እት ምሰኩብክ ሰበት ትረከባ ቱ። አናመ ወአቡክ ለአክተለፍነ እቱ አሸዩኦ ክም እሊ ልትዳገም” ቤለ ክዳገመዩ እግሉ።

ሐሰን እት ሕልም ህለ ወለ እት ዋቅዕ መትፈራግ

አበ እግሉ። ፍንጌ እለ ወሌህ ሕነይ እት እንቲ ህዩ ተዉዉ ብህል እት እንቲ ኬን ወእንሰር ፍር ፊር ቤለ። “እምዩ ትቤ!? “አይወ። እምክ ዋልዳይትከ። አየ ህሌት? ትሰኣለ። ቤለ ሽምሰዲን ወሐር እግል አዳም ለአስኦል አስክለ በዐለ ሰልጣን መሰር ለዐለ እተ ሰኒን ለህይ ጌሰ። ተዩልሉ ክሉ ዳገመዩ እግሉ። ህቱመ “አሰናይክ ወአሰናዮም ወለትክ ወወልደ” ቤለዩ።

ማሊ ምድር ህዩ እግል ስቲ ሐሰን እት ቤተ ዐራቱ እግል ትናጽፍ እግሉ ወለ በዲር እት ቤት ሓድጉ ለዐለ ዐፋሹ እት መካራቱ እግል ተጽንሐ ቱ አሰኣለዩ። ህታመ ክምሰል አብህ ቤለያተ ወዴት። ዐድ ምሰል እት ቤት ወዘር ሽምሰዲን ተአከቤ። ገሌ አስተንተነ ወለ መዳግም ሐሰት መትፈራግ እግሉ አበ። ሰርመ ፍንጌ ወድ ሚን አደም ወጅኑን ዕላቃት እግል ኢልህሌ ፈርሀ። ጌለመ እበ ሰያሰ ሐሰን በድረዲን ወወልዱ አልዐጁብ ምን ዓፊሆም ጸጊብ አበ። ለመልክ እንዴ መጽእ እለናዮም ሕነዩት እግል ትትከተብ አማውር እግል ሰብ ክቱብ ወትውሲቅ ሀቡ።

ላሊ ዓረት። ስቲ ሐሰን እት በዐል ቤተ ጸበረት እሙመ እት ሐያት እት እንተ ወለ እግል ሐቱ ዶል ረኣየት ወድ ርሕመ ትምኔት። ቅሉብ ምሰል ዐርገ ወትከረ። ስቲ ሐሰን ቤተ ቅድያተ ምን ቅብላት ሀን ወደ። ሰዲድመ እት ዐርቀይ ሐላሉ ሰኩብ ወለአከርር። (ጸብሬ ምን እሳት ተሐፍን) ክምሰል ልትበህል መርዓት እትትዳሌ ወሰብ ዐግል እት ልታፈ መዓድ ደንጎበ ፈረሕ ሳዐቱ እንዴ ዐለበ ተለው ወደ።

ሽምሰዲን እግል ወድ ሐሁ እት ቤቱ ክምሰል አተዩ እግል ዐጁብ ትላክ እቱ ኑርኦዲን

ለአትቃምቱ እንዴ ዐለ እግለ እት መዲነት ደማስቆ እብ እበነት ፋቅኦ እቱ ለዐለ ምፍቀእ እግለ ሐሰዩ ክልኤ እዴሁ ወሐር።”እሊ እግልዩ ለፈቅኦ ቱ”ቤለዮ። ሐ አብሁመ። አቤ እሊ ዐጁብ ወልካቱ” ቤለዩ። እሊ ወክድ እሊ እት አሰግደት አድሕድ ትለዋለው። ኑር አዲን እግል እሊ ሸዕር አሰመዐ።

እሕ! ወአህ! ሰኒን እት መትባዳይ ዐጁ በኬቱ። አናብዕዩ ትሻለተ እሊ ቱ አሰፋርዩ ትያበሰ!

ፍንቲት መክረሀተ የሀው እብ ዘዐት አፍመ ዐውዝ መሐበር ኢኮን ወለውቀት ወለ ላሊህ ኢትሰኩብት።

አቤ! ፈርሐት ፋጅኦተኒ በደል እትሰሐቅ ወእቀርድ እብ ብካይ ዓረተኒ!

እም ሐሰን ምሰል ወልደ አምሐበረት። ለሕልም መሰል ለዐለ አማን እንዴ ገብኦ ጸንሐ። ውሉድ ዋልዳዩ ሐቅፈ። ክልኦቶም እት እደይ አድሕድ ትባረደው። እሙ መስኪነት እብ ፈርሐት ድራረ እግል ኢትሕደግ አፍረሀት። ሐቆ ሰዕሞተት ወብካይ ሰፈላሉም ክል ምናምተ ከእግል መልሀዩ ምሸዊት ርሐ እት ወቅት ፍንቲት ዳገመው። ሐሰን ትሻመለ ወትጣሰሰ ወእሙመ እደዩ እት ወድ ርሕመ ተመህ ወደ።

ሐሰን በድረዲንመ። እግል እሊ መድሙን ለቡ ሸዕር አሰመዐ።

ሰኒን መሐለ እኪቹ እግል ኢልገጽጽ። ምነ እግለ ረከብኮ ምን ሌሃመ እለ! ናይ ረቢ ትሐይሱ።

ሰዲድ እለ ልርኤ። ወአያይ እብ ፈርሐታቱ ለሆሬ። ቅነጽ ትከበቱ መትላክያይ ፈርሐት እት ነሐርከ ሕቀፋ።

እብ ክምሰል እሊ መዳግም ቅሰት ኑር አድን ወሽምሰዲ ፍንጌ ጅን ወጃን ትምሆልል እንዴ ዐለት እት ክትብ ሕካያት እንዴ ትከተበት እት አጅያል ሐልፈት።

ሸህሪ ዛድ። ምን እሊ ለትፈድብ ሐካኪቶ ህሌት ረቢ አዝመ ምንዩ ምንዲ ገብኦ ወእንተ ሳምሐከኒ ሕሹም መልክ። ሚልካይ ልብዩ። ወመወጅሃይ መሲር ሐያቹ” ትቤ ከእግል ሰኩብ አስክለ ዐራተ ተወዝ ወዴት።

ሸህሪ ባር ወላሂ! ደንጎበ ቅሰስኪ አስክ ኢበጽሐኮ እግል ይእቅተለኪ”በልሰ እተ ክህቱመ መጦረ አክረረ። እብሊ ህዩ ቅሰተ ክልኦት ለሐው እብ ክምሰል እግሉ ቀርኦን ትርጀመት።

ምን ገጽ 2 ለአተላላ

ለእትሊ ወክድ እሊ ገብእ ለሀላ ዳረኩትቱ። ምን ቅድየት ለአትሻኩተ ወለአትገዋንወ ሀለው። እሊ አፍዓል እሊ ህዬ፡ ለቅድየት እንዴ አመርከ ሐል ዳይም ኢተአመጽእ እግለ ወለ እግለ ምን ቅሩብ ለከሰሶም ሰብአ ኢተሐድገ። ምስሎም ለምሰል ብዕዳም ሰብ ሽርከትከ እንዴ ትትሳዴ ባሰርት ናይ ለገብአ ክላፍ ኢለአይዶ ወኢፈቱ። እግልሚ ምን ዘርእ ክላፋት ወሐባለኮት ሊኢኮን። ምን አስከቦትለ አከይ- መቅሬሕ መክሰብ ሰበት አለቦም። እሊ ለመሰል ሐባለኮት ህዬ እግለ ቅድየት ምን ገቦዩ ለአስሕተ ወለሀላ ክላፋት ዲብ ርሽመቱ ለለዓርጉ አከይ-አፍዓልቱ። መት አታይ ዐበዩ እግል ልምሰል ቀድር። እብ ሰሜት ራድኢት እግል ልምሰላነ ቀድር። ወከም-ወከም ናይ አማን ወለረይሐ ለመሰሎ ቀድያት እንዴ ረፍዐው ለገብእ መትአታይ ዘርእ ፈንጨጋር ወነዐር መክለሰ አለቦ። ላኪን። ሽዑብ ሶዳን መሻክሉ ኖሱ እግል ለአርሄ እግሉ እግል ንእዘም ምኑ ብነ። ወለ ለድወለ ምንጠቀትመ ምን ገብእ። እግል ልሰደዩ ቀድረ ሊኢኮን በደለ ሽዑብ ሶዳን እግል ልግበአ ኢቀድረ። ለወድያህ ሰዳይት ህዬ እብ ናይ ሕበር መቅሬሕ ወመፋህመት እግል ኢደያሁበን ሊኢኮን። እብ ብድራ እበ ለትነሰኡ መባደራት ወምሰዳረት ሐል ለረክብ ክላፋት አለቦ። ከለ አማን እለ ሰበት ገብአት ሕነ ለንትባደር ወዲብ ማዕረድ ለነአቴቡ ሰበብ አለብነ። ምንመ ነአቴ ዲቡ እግል ዐድ ፍላን እለ ወደ ለትብል ብድረ እንዴ ኢእንገብእ። ዋጅብነቱ እነ ለመሰሎ ብዕዳምመ ምን ለሀሉ እግል መፋኸት ወሰሜት እንዴ ኢገብእ ዋጅቦምቱ። ከለ ዋጅብነ እንዴ ፈሀምነ ዲብ ወቅቱ መኒነ ለትትጠለብ እግል ነአትምም ብነ። ለምህም ጋር ላኪን እትሊ ወቅት እሊ። ምን እሊ እንሕራፋት ወሽከፍ እሊ እግል ንፍገር ወጅብነ። ለጋሪት ዲብ ናይ አማን መስከበ እግል ተአቅብልቦ። ሶዳንዩን ለማሌ ለትጠወረ ልግባእ ወእተ ለሐልፈዩ ዐስርታት ሰነዋት ለትጠወረ መሐባልክ ቀድያት ሶዳን እንዴ ፈግረው። እትለ መርሐለት መትዐደዩት አማነት መስኡልዩቶም እብ ዋጅብ እግል ልርፈዶም። ቅወት ብዕደት ምነ እለ መጽአት ትምጻእ በደላህም ለትገብእ እግል ተህሌ አለቦ። ሽዑብ ሶዳን ለመሻክሉ ለለአርሄ በክት እግል ልትህዩብ ወጅብነ። ክለን አግዋር ሶዳን ለህለዩ ድወልመ ወለ ሕዴ መቅደረትመ ምንመ ተህሌ እግለን። እግል አዜ ልግባእ ወእግል ዲመ ምነን ለትትጠለብ ሰዳይት ወመሻረከት እት ባልሐትለ ልትረኡ ለሀላ አከይ-መቅሬሕ እግል ልቀድማበን። እሊ ለበህለት ላኪን።

ናይ ሕበር ወኩሉ ለወክል ጅህድ እግል ልግባእ ወጅቡ ሊኢኮን። እንቱም ዲብ ሐል እለ ቅድየት እለ እግል ትሻርኮ አለብኩም ጽንሐ። እንዴ ትቤ መኔዕ ለበህለት ኢኮን። እግል ልትሳዴ ለቀድር ምን ለሀሌ ዋጅቡ እግል ሊዴ ለመንዑ አለቦ። እሊ ላኪን ዲብ ለኢለአትሐዜነ መርበይ ብዕድ እግል ኢልዋሌነ። ለናይ እለ መንጠቀት ድወል ወመነዘማትን። እሊ አዜ ዲብ ጎርነ ሶዳን ቃንጽ ለሀላ ሐርብ ወደማር ዲብ አብጠሮቱ ወባልሐቱ። መሻረከትን ወመብደአን እንዴ ፈረገዩ። ለወጅብን እግል ልቀድማ ወለክላፍ ሐል እግል ልርከበ እግሉ በን። ምናተ ናይ ሶዳን መሻክል ሌጠ ኢኮን። መሻክል ወክላፋት ብዕድመ ሰበት ሀሊ። ኩሉ ጋራት እብ ሕበር እግል ልትበገስ ዲቡ ለተአቀድረን ገበይ እግል ለአዋፈሓ በን።

ሰአል፡ ሓይሰ ርኢሱ፡ ምራድ ኤረትርዩ ወድወል ብዕድ፡ እሊ ደግሸ እሊ እብ ሻፍገት እንዴ በዋራ፡ እት ደማን ለቡ አብጠሮት



ሐርብ እንዴ ትበጽሐ፡ ሐ ሽዑብ ሶዳን እት ናይ ዲመ መስኩብት እግል ልትዐዴ ቱ። ምስል እሊ ላኪን መትሽዐታር እት ሶዳን ለነብሮ አብርዩእ ወናይ ኤረትርዩን ሰበት ሀሊ። ሕኩመት ኤረትርዩ መዋጥኒን እግል ትትከበት ለነሰአቱ ከዋዋት ወጅህድ ሚ መሰል? እምበልሁመ ሕኩመት ኤረትርዩ ድወል ብዕድ መዋጥኒን ምን ሶዳን እብ ገበይ ኤረትርዩ እግል ለአፍግረ ትወድዩ ለህሌት መዓወነት ወሰምሐት ክጡዋ ዐስተረ ልግበእ ውብዕድ ሚ መሰል?

በሊሱ፡ “እሰልፍ ለእምር ሲያሰትነ ሽሙይ እግል ንፍሀመ ሀላ እግልነ። እት ባዘር አው ሱግ ናይ ራድኢት ኢነአቴ። እት ሶዳን ለሀላ መዋጥን ናይ ለገብአት ትግበእ ዱለት። ምስል እለ አዜ ለህሌት ሓለት አምን ሕምርግት። ደማነት ሰበት

መቃበለት ርኢሰ

ኢህሌት፡ ረብሸት ወምድረት ሻባቱ ህለዩ። እብ ምድር ኤረትርዩ እግል እትዐዴቱ ለቤሊ፡ “ወረቀት አፍግር፡ ሺዘት ዝበዋ፡ እጃዘት ርኩብ ወመኪነትከ አዳሌ” ለልትበህል እበ ህግዩ ኢህሌት። እት ክምሰልሁታትመ ኢነአቴ። የምክን እት አክባርመ ኤረትርዩ እት ክምሰልሁ ኢህሌት። እብለ ፈግረው፡ እብሎህ ጌሰው፡ ቻድ አተው፡ ግብለት ሱዳን ተዐደው፡ እብለ ፈግሮ ወለአቱ ህለው ይእንብል። እሊታት እግለ ረብሸት ዝያደት ለኪልማ ቱ። ክእነ ለመሰል አክጠእ ጀሬ ዲብ ሀሊ፡ ወለኢታኬናሁ መደራት እት ሐርብ ዶል ለአበጹሕ፡ እግሉ እብ ከአፎ ክም እንጋብሁ ምስል ምን እንሸቄ ለሐይሱ። ክለን እትሊ ባካት ልህለዩ ድወል ምስል እግል ልትዝመ ወሐቱ ብዋረት ልብጠረ በን። “ኢከሰኩም ዲቡ፡ ሕነ ኖሰነ ህሌነ እሉ” ለልብለ ጀሃት ህለዩ ምን ገብእ፡ ‘ሽፈ ሊደዩ እግልክን’ እግል ቲበል

እለ ኖሰ መታጀረት እብ አደሚ ናይለ መሻመት ተ እብል አነ። መሻክል ናይ አዳም መጽእ ዲብ ሀሊ፡ ለመሻመት ሽቅሎም ረክቦ። ሰዳይት መስኡልዩት ደሚር ተ፡ ርዝቅ ብከ ወአለብከ ሽይ ብዕድ ቱ። ደወ፡ ነብረ፡ ማይ ወመስከብ ብከ ሚ ኢፋሉ ሽይ ብዕድ ቱ። ላኪን አዳም፡ አዳም ቱ ለረድኡ፡ ሰምነ እከ ለልብሉ ወለዓውኑ።

ከክምሰልሁ ሐቆ ገብእ፡ እት ሱዳን ለህለው ውላድ ካርጅ ወሱዳንዩን ኖሶም፡ እንሰር እንዴ መጽአው እግል ልትከተሎ ሐዘው ምን ገብእ እት አብያትናመ እግል ንክትሎም ወንትሐደርም ሐበት ምሽክለት አለብነ። ሕበዘት ብነ ምን ገብእ፡ እንዴ ትካፈልነ እግል ንብለዐ እንቀድር። ለአግደ፡ ሕነ እግል ኒደዩ ለብነ ሰዳይት ተ። እት ሱዳን እት መዐስከራት ወምኑ በረ እንዴ ጀምዐም ነብሮ ለዐለው ኤረትርዩን፡ ምስል እሊ ናይ አዜ መሻክል ወርበሽ እንሰር ምን ልትጸግዮ፡ ‘ተሰፊሕ

ትርአዩ ለልትአመን ኢኮን። ዝያድ ኩሉ ህዬ ሽዑብ ሱዳን ምን እሊ አቲ እቱ ለሀላ መሻክል እግል ልትባለሕ ቱ ለዐበ ሀደፍ። መቅደረት ወርዝቅ ካፊ ቦም። አብኮቶም ሰበት ተሐለካ ቱ እትለ ደረጀት እለ ኩሩያም ለህለው። እትለ አዜ ሱድፍት ለህሌት መደት ሐጫር ህዬ፡ ሰዴናመ እግል ኒበል ወንትፋወሽ ይእንቀር። ለሰዳይት ተአትሐዜ ህሌት፡ ላኪን እግል ሚ እብ ዐስርታት አልፍ ልትዐደው ህለው ትብል ወተአዛዬዕ እቦም፡ ወዲብ ልትናብዖ ትሳውሮም፡ ክምሰልሁ እግል ትሳውሮም ኖሱ ለረይሐክ ጋርቱ? እግል ሚ ሀደፍ ክምሰልሁ ትወዴ ህሌክ ወእብ ናይ ምን እጃዘት? እት ዓዳትነ፡ እግል ደዓያት ወአክባር ክምሰልሁ ትወዴ ህሌክ ምን ገብእ ዔብ ቱ። ሕነ ህዬ፡ ክምሰልሁ ይእንወዴ፡ ሰበት እሊ ሕዱድነ፡ እግለ እግል ለአጽሄ ወልትከተል ለልሐዜ ክሱት ቱ። እግሎም ለንትሐደር እቡ አርዛቅ ሀላ እግል ኒበል ምንመ ይእንቀድር፡ እግሎም ለገብእ እግል ኒዴ እግል ነአትፋዜዕ ወንካሰእ እንቀድር፡ ሕነ ሌጠ እንዴ ኢገብእ፡ ኩለን ገወውር ሱዳን ላተን ድወል ክምሰልሁ እግል ሊደዩ ቱ ምራድነ።

አክረቱ ህዬ ለመትከምካም ድወል መንጠቀት እንብሉመ፡ ክም እሊ እት ሱዳን ጃሪ ለሀላ መሻክል ዶል መጽእ ዱሉይ ጀላብ እግል ልጽነሕ ቱ ለልአትሐዜ። ፋንጎሕ ምድረት መጽአት ምን ገብእ ህዬ፡ ውሒዝ ምን መጽእ፡ ተርቅ ክእነ ምን ወዴነ፡ ብዕድ ብቅታት ጠቢዐት ምን ሳድፈነ እብ ከአፎ እንጋብሁ? እብ ከአፎ ምስል እንሸቄ፡ መሻክል እንዴ ኢመጽእ ህዬ መዳሊትነ ከአፎ ነአደቅቡ? መትከምካም፡ እሊ ወእሉ መስል ጋራት ለባሌሕ ሰበት ቱ። እት አዳምክ ለመጽእ መታክል ሕበር እግል ትትከሰእ ዲቡ ሰዴክ። ሕነ ሽዑብ እት መደት ንዳል እት ሱዳን ነብር ለዐሊ፡ ክም መዋጥን ሱዳን ቱ ነብር ለዐሊ። ቀደም ሕርዩት ልግበእ ወሐቀህ እት ሱዳን ነብር ለዐሊ ሽዑብነ፡ ሱዳን ጽጌዕ ወሕጌ ጋብአት እሉ ዐለት። ክም መዋጥን ድኢኮን፡ ክም ጋነ ወወድ ካርጅመ ሕሱብ ኢለአምር። እንሰር ለመጽእነ ሱዳንመ እት ወቅት ረህዩት ልግበእ ወመእከይ ክምለ እት ቤቱ ለሀላ እግል ልሕሰብ ቡ። ክእነ ዐዋዲ ዶል ትጠውር ህዬ፡ እግል መጽእክ መደራት ሕሩብ ልግበእ ወጠቢዐት እግል ትትዐደዩ ወትክህሉ ትቀድር። አርዛቅ ብከ መአለብከ ክም ካልእ ደረጀት ቱ ለልትዐለብ ወልትረኡ። ምናተ፡ ሲያሰትነ ወመብዳእነ፡ እት ክእነ ለመሰል ተዩልል፡ ዲብ ማዕረድ አው ሱግ መሻመት ለለአቱ ኢኮን”።

ዲብ ገጽ 10 ትተላሌ



(2^ይ ክፍል)



ሞናድል አረፋይኔ ቀደም ሕርየት

ግሪ ዲብ ታሪክ ወድ ክንፌ እግል ንብላሰኩም- ወድ ክንፌ እብ ሚ ሰቡብቱ መንበረት አስመረ ወኢጣልየ ተረግ እንዴ አበለ ዲብለ መሪር ንዳል ለተሓበረ ምን ትብሎ ለሰብብ እመርቱ። ወዲ ክንፌ አዋይን እስትዕማር እግል ልክሀሎ ሰበት ኢቀድረ። ምን አሮብ ኢጣልየ እንዴ ትብገሰ ዲብ ሰነት 1975 ዲብለ እብ እሳት ነድድ ወተንን ለዐለ ምድግ ሳሕል እግል ልሰሐን ሐረ። ህቱ ዲብ ዐግሎ ንዳል እግል ልትዐገል ምን ቤላቱ ህዩ ሚላኖ፣ ሮማ፣ በይሩት ወዐደን ዲብ ልብል ምስለ ምን አሚሪክ፣ ወአሮቤ፣ ንዳል አው ሞት እንዴ ቤለው አስክ ሰውረት ተንክር ለዐለው ፍራስ ሚዳን እግል ልኦቱ ለቀረረ። ህቱ “ዲብ ኢጣልየ ሸቅል ሪስቶራንት ሸቄ ዲብ ህሉ፣ ምዕል ሐቱ ዲብ ፒያሰ ዲኤም ለልትበህል መንተዘህ ምስል መልሂቱ ሻሂ ዲብ ሰቱ ምር ኢጣሊ ለአቀምቱ። ወዲ ክንፌ ህዩ እግላ ኢጣሊ ክምሰል ረኣ ፈርህ ምን። “አዜ ህዩ ሚ እግል ሊበለኒቱ ዲብ እላመ ሰላም እግል ንሕገልቱ!” ቤለ እብ ልቡ። ሰበቡ ዲብ ኢጣልየ ናይ ፈናተዮት አጅናሰ መዋዲት ግርጉር ሰበት ዐለ።

ምናተ ለኢጣሊ፡ እግል ወዲ ክንፌ እብ እኪት እንዴ ኢጉብእ ፈክ ሰኔት ለአውዱ ክምሰል ዐለ አረፋይኔ ይአመረ። “እንተ ዲብ አስመረ ሰኔ ዋዲ እግልዬ እንተ፡ ምን አስመረ አስክ ኢጣልየ እመጽእ ዲብ ህሊኮ ወረቀቹ ለአሳለዋክ እዩ እንታቱ ማሚ? አነ ዲብ አፊቾ ብያጂ እሸቄ ዐልኮ” ክምሰል ቤለዩ ወዲ ክንፌ ለተዐንብል ዐለት ሰራሪት ልቡ ሀድኦት። እንዴ አትለ ለኢጣሊ ዲብ ልትፈክር፡ “ለዐለ እግልክ መአሰሳት ወቃሊ ሸቅል እንዴ ሐደግክ እትለ ሚ ትወዴ ህሊክ?” ዲብ ልብል ሰኣል ደግመዩ። ወዲ ክንፌ ዲብ ልሰሐቅ “እትለ ትቤ፡ እትለ ብያቲ ሐጽብ ህሊኮ” እት ልብል በልሰ እሉ።

ለኢጣሊ አዜመ ሰኔ ተዐጀብ ወትፈከረ። ሰበቡ አረፋይኔ ዲብ አስመረ እት እንቱ ሸቅል ሰኔ ዐለ እግሉ። እብ ሰላዲመ ዲብ ወክድ ለህይ ምን ጽጉግም ዐለ። አዳም እብ ሰናቲም ሸቄ ዲብ

ከምሔርባይ ጽብ

ህለ አረፋይኔ ላኪን አላፍ ሰላዲ ጃቅፍ ክምሰል ዐለ ለኢጣሊ ለአምር ዐለ። እንዴ አትለ ለኢጣሊ “ክላስ ምስልዬ እግል ትሸቄቱ” እንዴ ቤለ ዕንዋኑ ሀበዩ ወአትኒን እግል ልምጸእ ሐበረዩ።

አረፋይኔ እሊ ክምሰል ሰምዐ ሰኔ ፈርሐ፡ አሰናይ ምን ሐጺብ ብያቲ ትባለሐኮ እንዴ ቤለ ረህየት ትሰመዐቱ። አትኒን ህዩ እብ አሳስ መዋዲዱ አስክለ ዲብ አስመረ ለለአምሩ ኢጣሊ ጌሰ። ዲብ መክተብለ ኢጣሊ ክምሰለ ውላድ ዐድ እግል ልሸቄ ክምሰል አስተብደ፡ አረፋይኔ ክምሰለ ዲብ አስመረ ለዐለ እቱ ወክድ ሐበን ወፋሽ ትሰመዐዩ፡ ዝያደት

ዳገነዩ ወእግለ በዐለ መአሰሰትመ ጀዘ ሐክመው እቱ።

እሊቱ ህዩ ሰብብ ንዳል ወዲ ክንፌ ለጉብኦ። አረፋይኔ እስትዕማር ዲብ ዐድ ወዲብ ዐለዮ ክምሰል ትካረፈዩ ዝያደት ሽዑር ወጠኑ ወናይ ንዳል ደሚሩ ዜደ። እስትዕማር ህዩ እምበል ንዳል ክምሰል ኢልትነወክ፡ ለልጁእ ህዩ ፍገሪት እስትዕማር ክምቱ ኢትረሰዐዮ። ምን ልጁእ አስክ ዐድ እግል ለአቅብል ገብኦ ምንገብእ ህዩ፡ አሰልፍ ድድ ናይለ አስክ መዐደይ ሕዱድ ለአብጸሐዩ እስትዕማር እግል ልትገበስ ክምሰልቡ ሸክ ኢወደ። አነ እግል ዐጄ እንዴ ቤለ ህዩ

ንዳል ድጌ ሰውረት ወሀይኦት ተድራብ ለዐለት አካን ተ።

አረፋይኔ ዲብ እምሀሚሚ እግል አውረሐት ተድራብ ዐስከሪ ክምሰል አትመመ ዲብ ጀማሂር ሳሕል ትወዘዐ። ለአሰልፍ ለትወዘዐ እተ ውሕደት ጀማሂር ህዩ ዲብለ ምን ነቅፈ እንክር ቅብለት እት መሳፈት 35 ኪሎሜተር ለህሊት ሕዳቅ ተ። ለዲብ ሳሕል እስሰት ለዐለት ውሕደት ጀማሂር፡ ምን ወክድ ዲብ ወክድ ዲብ ትጠወር ወተዐቤ ጌሰት። ክምሰል ተአምርተ ህዩ ብዝሓት አዋልድ ዲብ ጀማሂር ሳሕል ተሓበረዩ። ከረ ልኡል ገብረኣብ፡ ለተኪዳን ካሕሳይ፡ አሰላሽ ጎይትአም፡ ሊያ



ትረይሐ ወትብሰጠ። እበ በዲር ለወደዩ ውዳይ ሰኔ ህዩ ሰኔት ክምሰል ረክበ ተኣከደ።

ወዲ ክንፌ ምን ሸቅል መዋዐም ዲብ ሸቅል መክተብ መደት ሳምን ክምሰል ሸቀ አዜመ ምሸክለት ሓሪት መጽኦት፡ (ካራቪኔሪ ፖሊስ) እንዴ መጽኦ “ባዶፎራ” እንዴ ቤለ እግል አረፋይኔ ምን ሸቄ እቱ ለዐለ መክተብ ደረርክ ወደወ። ለፖሊስ “እንተ ዲብ ሪስቶራንት ኢጉብኦ ምንገብእ፡ እሊ ሕሹም ሸቅል መክተብ ናይ ውላድ ዐድቱ። ኢጣልዩን ሌጣቶም ለሸቄ ዲብ፡ ጸላይም ጀፈሩ ኢቀርዐ እንዴ ቤለ ተህዲድ ወሸሉት እንዴ ሀበዩ

አስክ ንዳል ሸምብርኪቱ ወጭሉ።

ወድ ኪንፌ እብሊ ዲብ ኢጣልየ ለሳደፈዩ አከይ መዋዲት እንዴ ደመሉ፡ እንዴ ኢልትመዩ ወኢልውዕል ምን እብ ዐስተር እት ረኣሰ ዋያረት ዲብ ለዐውል ለጌሰዩ ምድር አሮብ እብ በሐር ምስል አምዋጅ ዲብ ልትጋደል አስክ ሚዳን ትብገሰ። ምን ዐደን አስክ ቅብለት ሳሕል ለዐለ ሰፈር ህዩ ሰኔ መሪር ወመብቅያይ ዐለ። ምናተ ወድ ክንፌ ምስለ ምን አምሪክ ወአሮቤ አስክ ሚዳን ልጀርበሪ ለዐለው ሸባብ ሰብዓታት እንዴ ገብኦ ሐቆ ከም ሓይል ማይል እምሀሚሚ በጽሐ። እምሀሚሚ ሐቱ ምን ዲብ መደት

ገብረኣብ፡ አድሓነት ዓንዶም ወዘፋን አርኢያ ክምሰል መጽኦትሁ ወዲ ክንፌ አብ አዋልድ ለጉብኦ መስለ እቱ።

ዲብ ድዋራት አግረዕ ለዐለት ውሕደት ጀማሂር ምን አግረዕ ዲብለ ክርድንት ለዐለ መዲነት ነቅፈ ክምሰል ነክሰት አባይ ነቅፈ እግል ለአድሕን ጀርብ እቱ ለዐለ ወክድ ቱ። ጦር ሰራዊት እብ ምድር ወእብ ሰመ ነቅፈ እግል ልእተው ጀርቦ ወምሔርበት ህዩ እግላ መጽኦ ለዐለ ጄሽ አባይ ለአክምዶ እቱ ለዐለው ወክድ አረፋይኔ ቡተን ወአበደን ኢልትረሰዐ።

እብ ፈድል ሰሙድ ወመትሰባል ምሔርበት ጀብህት ሽዕብየት ነቅፈ ሐቆ ከርዶን 6 ወሬሕ፡ ዲብ ዮም 23 ማርስ 1977 ሐቱ ዶል እግል ዲመ ምን እስትዕማር ትባለሐት፡ ተሐረረት። እተ ወክድ ለህይ ወድ ክንፌ ምን ዲብ ድዋራት ነቅፈ ለዐለ መዐስከር ጀማሂር ዲብ ሕርርት መዲነት እንዴ አተ፡ ዲብ አግደ መክተብ ሙዲር ምዴርየት ሳሕል ለዐለ ዐሊሔጎ መንዴሪት ንዛም እስትዕማር እንዴ ከረ መንዴሪት ጀብህት ሽዕብየት ሰቅል ዲብ ህለ




ሞናድል አረፋይኔ ሓቀ ሕርየት

ለትሰመዐዩ ፋሽ ወሐበን ቅያሰ ይዐለ እሉ።

አርፋይኔ ለአብዝሐ ሰኔን ንዳሉ ዲብ ሳሕል ምንመ ወደዩ፡ ሐቱ ሰንዐት ሐለለቱ። ህተ ህዩ ህግዩ ትግራይት ተ። ትግራይት ዲብ ወዲ ክንፌ እንዴ በጽሐት ከፎ ደቀበት ኮንዶኤ። ላኪን ህቱዲ እምበል ሕላሌ እግል ለአምረ ግሱይ ኢለአምር። ለግራሁ ዲብ ጀማሂር መጽኦዩ ከረ ሊያ ወለተኪዳን እብ ትግራይት ዲብ ፈላክመ አክለ ረኣ ህዩ ዝያደት ቀንኦ ዐለ። ህግዩ ትግራ እግል እቅደር እንዴ ቤለ እግላ ምን አምሐርኻ ለለአምሩ ከሊማት ምስል ትግራ እንዴ ሐባበረ አብደዩ። እግል ትግራ ህዩ ከሊማት ጥልያን፡ እንግሊዝ፡ ትግርኛ፡ ዐረብ አምሐርኻ እት ለሐባብር ሐቱ ፍንቲት ትግራ እንዴ መሀዘ ምስል ሽዑብ ልትፋህም ክምሰል ዐለ መልሂቱ ዘክሮ። ላኪን ምስል እሊ ክሉ ቅዌት ህግዩ ክሎም መትሃግዩት ትግራ ምን ትግራ ለቀድሮ ወለዐል ዝያደት እግል አርፋይኔ ፈቱ ዐለው።

ወዲ ክንፌ “እለ ትግራይት ክምሰል እለን አዋልድ እግል እቅደረ ብዩ እንዴ ቤለ አምዕል ሐቱ ህቱ ወወድ ክቡድ ምስል ዲብ ሐቱ ዐድ ክምሰል ሸክፈው ሓምድ ክቡድ እግል ዐድ “ሰላም ወዐሌኩም” እንዴ ቤለ ለሰብለ ዐድ እግል ልብለሶ እሉ ዲብ ልታኬ እት ምግብ አረፋይኔ ኖሱ እንዴ ኢልትአመሩ “ዐሌኩም ወሰላም” ዲብ ልብል በልሰ እሉ። ወድ ክቡድ እብሊ በሊስ አረፋይኔ ሰኔ ከጅለ ሰበቡ ክልኦት ምስል ለመጽኦው ጋሽ እግል ሕድ “ሰላም መርሐበ” ሰበት ኢልትበህሉ። አረፋይኔ ላኪን ምን ህግዩ ትግራ እግል ልቅደር ለዐለት እሉ ንዩትቱ እት ልትባደር እት ሰላምለ መለሀዩ ለበልሰ።

ብዕድ መስከብ አረፋይኔ ምን ንዋይ ኢጨንትር አጣል ህለ እግል ሙጀርሐን ለልትሓረድ ወእንሰ ህሊት አስክ ድፈዕ ለትትፈረር እብሊቱ ህዩ ለሸዑብ ዶል ለአጣሎም ጀርሶምተ “ዐስ አረፋይኔ ልትብገስ እትከ” እት ልብሎ ረገሙ ዐለው። ሰበቡ ዲብ ከሌብ አረፋይኔ ለትመጽእ ጠሊት እግል ትትሐረድ ዲኢኮን እግል ትተወብ ሰበት ኢትቀድር።





(2^ይ ክፈል)

ኬትባይት፡ ናጽነት አፍወርቂ

ህጅክ ምስል ወለት - ዐሊ



ፋዋና ምስል ዕያላ

ወለት-ዐሊ ሐመልማል ረያም ተ። ለክቡብ ሸክል ገጽ ወለት ዐፈር አው ሳሆ ቱ ለልላሽቦህ። “ምን ቆምየት ሳሆ እንቲ ወለት-ዐሊ?” ትሰላልክወ ምን ዐለት እቱ ዝክርያት እግል እሸንክ ምን ሐዘኩ።

“ትግሬ አኑ” በልሰት ዲብዬ ብዙሕ እንዴ አትትአየሱ አደንገረት። እግል ህጅክ አተላላፊ።

“ንዳልን መሪር ቱ! የም ትትፋቀዱ ዲብ ህሌኩ የሆው ሕናቱ እሊ። አነ ዲብ ክእነ ለመስል ሰውርያይ ንዳል ሹርክት አነ!” ነፍሼ ለይአምን እቱ ተዋልል ብዙሕ ቱ። እብ ፍንቱይ እት ገሌ-ገሌ ሕናባት። ሐለት አባይ ዲብ ትትደቀብ እቱ አውካድ። ሸዐብን ምስልን እት ለአስተሸህድ ዶል ትርእዩ። ለደቅብ ሕብር ለአትፈክረኒ ዐለ። ሳድስ ወራር። ሸዐብን እግል ኩሉ ናይ ነፍሲያት ወዛህር ሕናባት ምስልን ጋብሀዬ። ምጀርሒን እብ ሳውራቱ ጎረተ ወሹሀዳሁ ቃብረ።

“ዎሮት አርኔክ ለጽብዋ

ምናድል እንዴ ተለዩም። ምጀርሒን ለረፍዖ ወሹሀደእ ለቀብሮ ሸዐብ ቶም ለዐለው። እት ክእነ ለመስል ወራት እት ህለው እብ ረጅም ክቡድ አሰለሕ ወዋያራት ለበዱ ሕዳም ይዐለው።

እት ሰነት 1985፡ በራጊድ እት ከፈፍል-ዴሽ ክም ትወቀለዩ፡ ብርጌድ 70 ምስል 31 ትሓበርኒ ወክፈል ዴሽ 61 አቂምን። አነ ህዬ ሐኪመት ክፈል-ዴሽ ገብአኩ። እት ሰነት 1985፡ ሚርሓይት ቅስም ውሕደት ዐመልያት እንዴ ገብአኩ እት ሐርብ ባርንቶ ሻረኩ። እት ሐርብ ባርንቶ፡ ቀደም አንሰሐቦትን። ምጀርሒን ለራፍዓም ሸዐብ አሮት አርኔክ ለጽብዋ ምናድል እንዴ አትለምም መጽአውን። ለምናድል ደርቦም ገብእ ዐለ። ምን ሸዐብ ዎሮት ዕቢ ለቤል እናሱ። እንዴ ሸአጌኒ። “እት ገበይ ለአስተሸህደው ዲብን ቃብራም ህሌን” ቤሌኒ።

“ከረ ምን ቶም፡ አርኔኩም

ህዬ?” እቤ እንዴ አልትአመሮ እግል አልብደው ምኒን ንትሓፈዝ ሰበት ዐለኑ።

“አስማይ ናይ ኩሉም እንዴ ጸበጥናሆም ለትበገሰኑ። ግረ ታርፍ ሀለ። ወረቀት ለብጎሩ ጅንዲ ግረ ታርፍ ሀለ። ለወለት ላኪን፡ ፍረወይኒ ፍረዝጊ ትትበህል” ዶል ቤላ፡ ለስሜተ ምን አፋሁ ለአፍገረያተ ለሱረትለ መልሀየቼ እት መደት በልሽም እት ገጩ መትገሳየ ሐቱ ገብአት። ፍረወይኒ ምስልዬ ለትደረበት!

ሐኪም ክፈል-ዴሽ፡ ሐኪም ሌጠ አኩን። መራዕያይ ምጀርሒን - ልባሰም እት ተሐጽብ እሉም ክል ምዕል ነዳፈት ገርቦም ትራቅብ። ላሊ ከላሺንክ እንዴ ጸርክ ዋርድየት ትትመዩ። መካይን ሸዐብየት ምን ጥያራት እግል ልትሐበወ፡ ላሊ ተን ለልትጋዐዘ። ላሊ ልድዕካህ ለትመየየ ገበይ ጨበል። አደሐ እግል አትትከሸፍ ለአሱረን እግል ተአትባድዩ ሰበት ብዙ አሰቡሕ አቅሹን እንዴ ባተክኩ ለምድር እት ንሕየት ወማሰሐት ተአቱ። ጥያራት ሐርብ አሰክ አሰር መካይንመ ሰበት ልርእያሁ፡ እግል ምጀርሒን እግል

ጣረቀቱ አኩን። ሸኩቲትመ ምን ረግዙ ደም ለአመጽእ። ባንከት ደም አሉብ። ላኪን ደሙ ለከለሰ ጅሮሕ መጽአኩ። እሊ ጅሮሕ እሊ እግል ተአንግፋ ሐቆመ ገብአኩ። እስልፍ ደም እግል ትትበረዕ እሉ ብዙ ምን ገርብን እንዴ ጀበድናቱ እግል ምጀርሒን ደም ለነሀይቦም።

‘አ’ ለጅንሱ ደሞም ጅማዐት ክል-ዶል ቱ ደም ለልትነሰእ ምናም። ጸሃይኔሽ ብርሃኔ፡ ብርሃኔ ባህታ ወሙሴ እየብ ለልትበህሉ ውላድ ውሕደትን። ጅንሰ ደሞም ‘አ’ ሰበት ዐለ፡ ብዙሕ ወክድ ደም ትነሰእ ምናም። እሉም መልሀያም፡ ደም እብ አርጣል እት እንጀብድ ምናም፡ ብዙሕ ለነሀይቦም ቱ በደለ ይዐለ። ሻሂ ሐረገት እንዴ ሰተው ቱ ሸቅሉም ለአተላላፊ ለዐለው።

አፍዐበት ክም ጸበጥኑ። ከረን እግል ንህጅም ጅሩባም ዐልኑ። ውሕደት ዐመልያት ህዬ ሼተል ዲብ ትትበህል አካን ሐድረት። ማይ ወዕጨይ ሰበት በ ለአካን ውጤት አካን ዐለት። መልሀያምን ከረን እግል ልጽቦጠ ቅሩባይ ዐለው። ምጀርሒን እንዴ ረፍዐው ለመጽኦ ሸዐብ።



ኢልልከፈ ዲቦም፡ ምድር እንዴ ኢጸቤሕ ለገበይ አሰክ ከሉሚተራት እንዴ ሄረርን ነኡትመሰሰለ።

ውሕደት ዐመልያት፡ ዲብ ሐርብ ነኡቱ ዲብ ህሌን ዲብ ዴሸናቱ ለንትጸገዕ። ለበዝሐ ወክድ ለክፍ ለዐሬ እብ። ሻፍገት ራድኢት እግል ኒዴ ገብአን ምን ገብእ ህዬ። ምን ዴሸን እግል ኒሪም አለብኩ። እተ ቀበትለ ሐርብ እንዴ አቲና ቱ ዐመልያት ለእንወዴ። እት ዐመልየት ለአቲካሁ ጅሮሕ፡ እብ ፍንቱይ ደሐን ህሌኮ እት ልብለክ ወልትሃጅክ ምስልክ እት እዴክ ዶል መይት እትኩ ለከልቀ እትከ ምድረት ቀላል አኩን። ዎሮት ጅሮሕ ዶል መጽኦ። እስልፍ ለልትነዳ ህለ ደሙ እግል ተአብጥር እሉ ብዙ። ገሌ ምጀርሒን ላኪን በዲር ደሞም እንዴ ትጨመመ መጽኦኩ። ገርብን ጠልገት እንዴ

“አብሸርኩም፡ ንዳልኩም ቅሩብ ተሚም ሀለ። ከረን ቅሩብ መትጸባዋ ህሌት። ዝ-ወረቀት ታርፈቶም ህሌት” ክም ቤለውኑ ሕርየት ክምለ ረኩብን መሰለ እትን። ከረን እግል ንእቱ ዐፍሽን እት እንከማክም ህዬ ለልአሰፍ ከበር መጽኦኩ።

ዴሸን ምን ማርያም ጥንቅለሐሰ አሰክ ሐሊብ-መንተል እስሐብብ ዐለ። እብ ኩሉ እትጅሃት ለዐለየ ውሕዳት እንዴ ትዋፈቀየ አባይ እት ለሃጅመ ሰኒ ልትቀደመ አጽበሐየ። ቦጦሎኒ፡ ቦጦሎኒ ክልኤ ናይ ክፈል ዴሽ 61፡ ብርጌድ 13፡ እብ ወደግ ሸፍሸፊት እት ትትሓባዕ አቲት። ሀደፈ፡ እግል ከረን ለዓል፡ አባይ መርከዝ (መምርያ) አባይ እግል ጸቢዋ ቱ ለዐለ። ሚርሐት ንዝም ደርግ ወንምየቶም እብ እደዮም

ቦጦሎኒ ክልኤ ምን እሊ ከርዶን እግል ትፍገር ሰኒ ትሩድ ሐርብ ደም ወዴት። ብዝሓም አንፋረ ህዬ። ምንለ ከርዶን ለሀይ እግል ልፍገሮ ክምስል ኢቀድሮ ክም አመርደው። እስትሸሃድ እብ እዴ ናሶም ትከየረው። ብዝሓም እተ ድንኪክ አስተሸህደው ወትጃርሐው። ለትጀረሓመ ለፈግር እበ ገበይ ክም ይህሌት ዶል አመራ፡ ርሕክ ቅትለት ክም አግዶ ሐል ረአየ። ዴሸን ትደረክ እንዴ ኢገብእ። ፍዝ ገብአ። ወድ-ጸገዳይ ወወድ-ሀይሌ ለልትበህሉ ሚርሐት ቦጦሎኒ አስተሸህደው። ገሌ መልሀያምን ህዬ ሸዐብን እት አብያቱ እንዴ ሐብዐየም፡ ጸልያም ሰፊ እሉም አፍገረዮም ወዲብ መልሀያምም ክም ልትሓበር ወደ።


ልተላሊ





አርዛቅ

በሐር



መዳልያይ፣ ሳሚኤል ኪርሰ ተርጀመት፣ ሳልሕ ገመ

ድሀ-ር አሽቃል ዓሰ፡ ዲብ ደማነት ነብረ ወእቅትሳድ

ድሀ-ር አሽቃል ዓሰ፡ እብ ርሐብ ፈሀም ልትሸራሕ እት ህለ ዳይናሚካይ እት ገብእ፡ እብ ትሉሉይ እት ለዐቤ ወልትጠወር ገይሱ፡ ለህለ ዲብ ዐቦት ነብረ ሙጅተመዕ ዛይደት ዶር ለቡ ምህም ጋርቱ። ምን ጀለቦት ዓሰ አው አከቦት እንታጅ አስክ ኦብጸሐት ዓሰ ዲብ ዕዳገ ለሽምል ርሐብ ነሻዋ ላቡ ሰበትቱ፡ እግል ለትፈናተ ክፋል ሙጅተመዕ ለአሻርክ። መዋ-መጦር ምስል እሊ መጃል እሊ ለገይሰ ነሻጣት በህለት ክም ሽቅየት ወአስነዮት ሽግዒት ጀለቦት ዓሰ፡ አትሳናይ ጅላብ ወመቶር፡ ጽዒን ወሕድረት ዓሰ ወብዕድ ወራታት በክት ሽቅል ዲብ ክስተት ዶር ዐቢ ለአወቁ። ውላድ ዲብ ጀለቦት፡ ሰልሐት ወአስነዮት መቶር ወጅላብ ወሐዲር ወጽዕነት ዓሰ ወበረድ ሻርት እት ህለው፡ አንሳት ህይ ዲብ ሽቅየት ወአስነዮት ሽግዒ መጀለቢ ዓሰ ወአዝበዮት ዓሰ ልትፈረረ።

እሊ ንኡሽ መጃል ዶሩ እት አከዶት ደማነት ነብረ ወአብደዮት ሐገሌብ ቀለል ክም ኢኮን አመሮት ምህምቱ። እብ ደረጀት እዲን እብ ተቅዩም 38 ሚልዮን አንፋር እት አሽቃል ዓሰ ወሐርስ ዓሰ እንዴ ትፈረረው ክም ሽቁ ልትሀደግ። ምን እሎም ለ95 ምእትያት (36 ሚልዮን)ዲብ አፍራቅዮ፡ ኤሰዩ ወግብለት አሚሪክ ለነብሮ ቶም። እምበል እሊመ 68 ምእታይት (26 ሚልዮን) እት አሽቃል በሐር ወዋዑም ማይ ለትፈረረው ህለው። ዲብ ተጠውር ለህለዩ ድወል 78 ሚልዮን ምን ዕሙማይ ብዝሐ ሽዐብን ናይ አምዕላይት መናበረቱ ምስል ጀላቦት ዓሰ ወምስሉ ለልትጸበዋ አሽቃል ለረከዘት ተ።

እብ አሳሰለ ዲብ ሰነት 1996 ለፈግረ ሸሬሕ እድንያይት መነዝመት ሐርስ ወነብረ “ደማነት ነብረ” ልትበህል እት ህለ፡ ውላድ አዳም ሰኒ ወፋዝዕ እግል ነቢር ለሰድዮም፡ ድሙን ወካሬ ጽበዋ ላቡ ነበሪት ክም ምራዶም ወሕርያዮም እት ለገብእ ልግበእ ወክድ ረክቦ ዲብ ህለውቱ። ሐቲ ደውለት ወለ እግል ካምል ሽዐብ ነብረ ካፍየት እግል ተአፍሬ ወትቀድም መቅደረት ላብ ምንመ ትገብእ፡ ውጁድ ነብረ ዲብ ደረጀት ዓኢላት ወአፍራድ ለኢበጼሕ ሐቆ ገብእ ላኪን፡ ለደውለት እብ ነብረ ነፍሰ ቃድረት ተ እግል ትትበህል ኢትቀድር።

እብ ነብረ ነፍሰከ ቅድረት ዲብ አከዶት፡ ደማነት ነብረ እብ ደረጀት ዓኢላት ወወጠን ልትርኤ ዲብ ህላቱ ልብሎ ገሌ ዳርሲን ክመ ለአተፍቆ ዲቡ። እብ ነብረ ነፍሰከ ቅድረት ዲብ ደረጀት አፍራድ ወዓኢላት ደማነት ናይ ነብረ እግል ለአክድ ኢቀድር። ክም መሰል እግል ንህደግ፡

ህንድ እብ ነብረ ነፍሰ ለቀድረት ደውለት እት እንተ፡ ለበዝሐ ክፋል ሙጅተመዐ ላኪን ልሳዕ ደማነት ነብረ ኢረክበ። ቅብላት እሊ ሲንጋፖር ወሆንኩንግ ልሳዕ እብ ነብረ ነፍሰን ለኢቀድረዩ ድወል እት እንተ፡ ለበዝሐ ክፋል ናይ ሙጅተምዓተን ደማነት ነብረ ለረክብ ቱ። ሰበት እሊ፡ ደማነት ነብረ ልትበህል እት ህለ፡ እብ ናይ አፍራድ፡ ዓኢላት፡ ሙጅተመዕ፡ ድወል ወእዲን ለልትጸበዋ ለትአሰሳቱ።

ድሀ-ር ለቅያሱ አሽቃል ዓሰ፡ ዲብ አከዶት ደማነት ነብረ እት ለትፈናተ ደረጃት እንዴ ክፋፈልክ እግል ልትርኤ ቀድር። ሙባሸር ወኢሙባሸር ዶሩ ዲብ አድመዮት ነብረ ዓኢላት፡ ዲብ አከዶት ዕዳገ ወዲብ አከዶት እድንያይት ደማነት ነብረ ዐቢ ወቀይ እግል ሊዴ ለቀድር ድሀ-ር መጃል አሽቃል ዓሰ ቱ። እምበል እሊ ዲብ ዓብዮት እተይ ወአስናይ መናበረት መጅተማዕ ዐቢ ዶር ቡ። ለትፈናተዩ ዓኢላት ለልስተህልካሁ ዓሰ ወለ እብ ብዝሐ ወኑዕየት ልትፈናቱ እንድኢኮን፡ ዲብ አድመዮት ሙነት ወጽበዋ ቅዛእ ሰኒ ለብ ነብረ ሐዞቱ ውቅል ክምተ ለትፈናተ ድራሳት ለአክድ።

ምን ዘበን ቅዱም እንዴ አንበተ ወድ አዳም ወራታት ጀለቦት ዓሰ ክም አግደ ዓማት ነብረ ልትነፈዕ እቡ ክም ዐሉ፡ ምስል ተጠውር እዲን ህይ ክም ዓማት እቅትሳድ ወመናፌዕ አሽቃል ልትነፈዕ እቡ ጸንሐ ወህለ። እትሊ ወክድ ን ምስል ወሰኑት ብዝሐ ሽዐብ እዲን ጠሉብ ነብረ ዓሰ እብ ለትወቀለት ደረጀት እት ለዐቤ ገይሰ ህለ። ክም ነቲጀቱ ህይ ፈርያት ዓሰ ዲብ ሰነት 95 ሚልዮን ቶን ባጼሕ ልትረከቡ።

ምስል ዐለምን ዲብ መጃል ተክኖሎጂ በሐር ሻፍግ ተጠውር ተርኤ ዲቡ ለህለ ወክድ፡ አሽቃል ዓሰ ወናይ ማይ ጽበዋ ኦብሐር ዋጅበት እዳረት መትነፍዖት ሐቆ ኢገብእት እሉ፡ ትሉሉይ መናፌዕ ዲብ ተጠውር እቅትሳድ፡ አከዶት ደማነት ነብረ፡ ከደማት እጅትማዕየት ወተጠውር ድወል ዲብ ብቅት እግል ልትካሬ ክም ቀድር ብዝሓም ባሕሲን ለሐዝር። እትለን ለሐልፈዩ 20 ሰነት ዐውል ዓሰ ወነቲጀት ዓሰ እብ ሻፍግ ለዐቤ ጸንሐ ወዘይድ ህለዮቱ አህምየት ድሀ-ር ብትር ዓሰ ምን ኪን ለገብእ አሽቃል ርቁብ ጋብእ ህለ። ሰበት እሊ ብዝሓት ዲብ ተጠውር ለህለዩ ድወል ናይ ቀበት ዐደን ደማነት ነብረ እግል አከዶት ዝያድ ዲብ ድሀ-ር ለቅያሱ አሽቃል ዓሰ እንዴ ረከዘዩ እግል ልሸቀዩ ጅቡራት ህለዩ።

እት ሰነት 1980 እስዳር እተይ ዓሰ 15 ቢልዮን ዶላር ለዐለ። ዲብ ሰነት 2001 እት 56 ቢልዮን

ትወቀለ። እተ ወክድ ለሀይ ምን ዲብ ተጠውር ለልትረከብ ድወል እግል ተሰዲር ልትለክክ ለዐለ ዕሙማይ ፈርያት ዓሰ ምን 40 አስክ 50 ምእታይት ለዐቤ እት ህለ፡ ተጃረት ዓሰ ህይ ምተሐት 4 ቢልዮን ዶላር እት ሐድ 18 ቢልዮን ዶላር ዐቢት። ሰበት እሊ ድሀ-ር አሽቃል ዓሰ፡ ዲብ መጃል ዓብዮት እቅትሳድ ሙጅተማዕ ዐቢ ዶር ለቡቱ። እብሊ ህይ፡ ዲብ ናይ ቀበት ዐድ ዕሙማይ እተይ (G D P)ዐቦት እቅትሳድ ናይ ሐቱ ደውለት አካን ውቅል ለጸብዋ ጋብእ ክም ህለ ለትፈናተው ሰብ መቅደረት እቅትሳድ ለአተፍን። እብ ተቅዩም ምን 0.5 አስክ 2.5 ምእታይት ዲብ ናይ ቀበት ዐደን ዕሙማይ እተይ ጸብዋ ክም ህለ ለሀድጎ። ዲብ ገሌ ድወል ክም ከረ ሰኔጋል ዶል እንርኤ፡ ምስል ብዕድ መጃላት እብ አትጃገሮት አሽቃል ዓሰ አሳሲ ዓማት ዐቦት እቅትሳድ ቱ። ዲብ ዕሙማይ እተይ ናይላ ደውለት ህይ አስክ 7 ምእታይት ሽምል።

እሊ ክእኒ እት ህለ፡ ዲብ ኤረትርዩ ደማነት ነብረ እግል አከዶት ውጁድ ካፍየት ነብረ ክም ለህሌ እንዴ ወዴክ አውለውየት እብ ረተቦት ለልትሸቁቡ፡ ካፍየት ነብረ እብ አውጀዶት መንበረት ሽዐብ ክም ትሰኔ ከዲም ቱ። ዓብዮት እተይ ወፈርያት ዓሰ እግል “አከዶት ደማነት ነብረ እግል ክሉ” ለልብል ወጠንያይ ሀደፍ ወብዕድ እሉ ለመሰል አህዳፍ ዲብ ሐቀቅት ዶር ለቡቱ። አርዛቅ በሐር ቀየሕ ኤረትርዩ ልሳዕ ለኢትበርበረ እብ ኖስ ኖሱ ለልትፋሬ ጠቢዓይ ክልቀት ሰበትቱ ዋጅብ በርናምጃት ዐማር እብ ሰተቶት ወነዲፍ አግቡይ እዳረት ወድሙን ንዛም ጀላቦት ዶል ገብእ ዲብ ወጠንያይ መሻሬዕ እብ አውለውየት ለልትርኤ ደማነት ነብረ ወነሻጣት ትጃረት እብ ዓብዮት ዲብ አምጽኦት ሰርፍ ካርጅ ለልሀሌ እሉ ዶር ሰኒ ዐቢቱ። እሊ ህይ፡ ዲብ ዐቦት መሕበር እቅትሳድ ሙጀልበት ዓሰ ዋዴሕ ተቅዩር እብ አምጽኦት እቅትሳድ ወጠን ዲብ አተረዶት ዶር ዐቢ ለህሌ እሉ።

ዲብ ኤረትርዩ ብጸሕ ለህለ መትነፍዖት ነብረ ዓሰ አው እስትህላክ እግል ዎሮ ነፈር ምስል እሊ እብ ደረጀት እዲን ልግበእ ወእብ ቀራት ሰጁል ለህለ አስተህለኩት ዓሰ ለልትመጣወር ኢልግበእመ እንዲኢኮን፡ ሕክሙት እብ ትወድዩ ተዕቢኦት መትነሻር ዓሰ እተ ለሬመ ወእብ ዓዳቱ ወለመዱ ብዙሕ አምር ለኢዐለ እሉ ሙጅተመዕ እንዴ ኢተርፍ ጠሉብ ወረቅበት ክም ወሰከ ልትአመር። እሊ በህለት ላኪን ክሉ ሙጅተመዕ አምር ነብረ ዓሰ ቡ እንዴ ኢገብእ፡ አስክ



እለ መትነፍዓይ ነብረ ዓሰ እግል ልግበእ ትሩድ ሽቅል ወአንተጅት ለጠልብቱ። ነዲፍ አግቡይ እዳረት መትመዳድ ዓሰ ወተዕቢኦት ክም ለአትሐዝዩ እግል ልትረሳዕ ለአለቡ ጋርቱ። ድራሳት ሓድረት ሓለት ዕቁር ርዝቅ በሐርን እብ ኢሀለዮቱ ህይ ዋዴሕ ወራቴዕ በራምጅ ዐማር ጀለቦት ዓሰ እግል ሰተቶት መሻክል ክምቱ። እዳረት ወእስትሰማር ትሉሉይ መትነፍዖት አርዛቅ እግል አድመዮት ድራሳት ክዙን ጽበዋ አርዛቅ ልጽኖሕ እግልዩ ለኢለተብል ጋር ክምቱ አመሮት ምህምቱ።

ድሀ-ር አሽቃል ዓሰ ኤረትርዩ እት 1950ታት ሰኒ ነሺዋ ሰበት ዐሉ፡ ዲብ ክል ሐል 25,000 ሜትሪክ ቶን እት ልትጀለብ አስክ ድወል ካርጅ እግል ተሰዲር ልትለክክ ክም ዐለ ወሳይቅ ውዛረት ርዝቅ በሐር ለአክድ። ምናተ እብ ሰብ አንዝመት እስትዕማር ለገብእ ለዐለ ወራታት ጀለቦት ዓሰ እግል ልብጠር ሰበት ቀድራ፡ እተዩ እት ልትደሀር ልሄርር እንዴ ጸንሐ፡

ዲብ 1980ታት እብ ካምል እግል ልብጠር ትጀበረ። ሐቆ ሕርየት ላኪን ሕክሙት እግል እብ ሰብ ሐርብ ድሙር ለጸንሐ መጃል እብ ድማማን እግል አትሐሰሳዩ ፊራሮ ትርድት እንዴ ሀረሰት፡ እተይ ዓሰ ምን በሕ ዲብ ሐድ 10,000 ሜትሪክ ቶን ዲብ ክል-ሰነት ክም ልትወቀል ከድመት። እሊመ ልገብእ እንዲኢኮን፡ ምስል ለህለ ክዙን ጽበዋ እብ አትመጣወሮት ዶር እሊ መጃል እሊ እት አድመዮት ውጁድ ነብረ ወዐቦት እቅትሳድ አስክ-እለ ድሀ-ር ክም ህለ ለአፍህም። በሐር ቀየሕ ኤረትርዩ እት ሰኒ ምህም እስትራተጅያይ ባካት ሀሌዮተ ሌጠ እንዴ ኢገብእ፡ እብ ለባቱ ጽበዋ ዲብ እዲን ሐድ አማክን ቱ ለልትጃገረ። እሊ አርዛቅ እብ ተአስትህል ዶል ልትከደም ዲቡ ድሀ-ር አሽቃል ዓሰ ለለትሐዜ እህትማም ወእስትሰማር ዶል ገብእ እቱ። ዲብ ዓብዮት ናይ ቀበት ዐድ ጠሉብ ወእስትህላክ ነብረ ወእግል ተሰዲር ለገኔሕ መናፌዕ እቅትሳድ ለትህሌ እሉ ሐዞት ሰኒ ዐባይ ተ።

ሸባብ



ነጃት ዑሰግን

ዐውቴ ሚ ተ?



ወድ አዳም ዲመ እብ ዐውቴ ልትሃጌ። እሊ ህዬ፡ እብ ጠቢዐትነ ፅዑታም እግል ንግበእ ሰቡት እንፈቱ ቲ። ክል ምርት ዐውቴ እግል ርሐ ፈትዩ፡ እንዴ ተዐወተ ለእለ ለሐዘ መርሐለት እግል ልብጸሕ ላሊ ወአምዕል ለሐሰብ። ከዐውቴ ህዬ፡ ዐውቴ አፍራድ፡ ዐውቴ ብዝሓም፡ ዐውቴ ክሉ ምጅተመፅ፡ ወዐውቴ ናይ ወጠን እግል ኩሉ እግል ትትበህል ትቀድር። ከዲብ እለ ናይ ዮም ሰፍሐትነ ዐውቴ ሚተ፡ ለልብል አርእስ ክቱብ እዱልያም ህሌ።

ሽዑብ ኤረትርዮ፡ እትሊ ለሐልፈ ርቦዕ ዘበን (1998 -2022) እብ ኢመሰከብት ወትሩድ መትነዓይ ድቁባም ሰብ ሓለት ሕነ ለልብሎ ብዙሕ ጀርቤታት ገብእ እቲ። ብርእ እንዴ ኢልብል እብ መትዐዋቱ፡ ዲብ ሓዳስ ታሪካይት መርሐለት ልትዐዴ ህለ። አጅያል ሽባን ሐቅ ሕርየት፡ አክል ሕድ ክም አጅያል ንዳል ለልትረኤ ወለለአትዐጅብ ታሪክ ሸቀው። እግል 30 ሰነት፡ ሼቅየት ወኬድመት ሰብ ቃብል ላቶም፡ ሰብ ሓለት ሕነ ለልብሎ ወምን አክልነ ዲብ ቀር አፍሪቀ ለቤለው ወሰላም ቀር አፍሪቀ ለሐምርጎ ለዐለው ዮም ፋሽላም ዲብ እንቶም ርእያሞም ህሌ።

ቀደም አርበዕ ሰኖታት፡ እት ፍንጌ

ኤረትርዮ ወአቶብዩ እትፋቅ ሰላም ሐቆለ መትአካዱ፡ ኩሉ ሔዝያይ ሰላም ወዐማር ለትወቀለት ሰእየት ራክብ ዐለ። ክምሰልሁ ምንመ ገብእ፡ ዲብ ርክብት ለዐለት ሰላም ለቀንአው መሐምርገት ጀሃት እት መትሸርዓን ሌጠ አተው። እግል ወቅቱ መሻክል ትከለቀ። እትለን ለሐልፈዩ ክልኤ ሰኖታት ህዬ፡ ሐር እንዴ አቅበልክ ለእኩይ-ታሪክ በዲር እግል ትድገም ለመሰል፡ ዐቢ ዐሰከርያይ ህንዲዶ ወምን ቡ አክልዬ ትረኤ። እብ ውሕደትነ ህዬ ክመ እዩዱ ፈሽለ ከእያድ እት ማይ ትርኩሽ ገብእ። ሽዑብ ኤረትርዮ፡ ክም አተላላይ ናይለ እት 1940ታት ለእንበተዩ ናይ ሰላም ስያሰት ግድለ እግል ሕቁቅ ለአተሐደዩ፡ እት 1961 አሰክ ንዳል ሰለሕ እብ መዐትዳዩ፡ ሕርየት አምጸአ ሌጠ እንዴ ኢገብእ፡ ምነ እለ ረክበ ወእብ ቃሊ ደም ለማጽአት ሕርየት እግል ልዳፌዕ እግል ክልኦት አጅያል እግል 60 ሰኖታት እት ክቡድ ንዳል ትጸመደ።

ሰላምነ ወሕርየትነ እግል አድመኖት ለሓለፍናሁ መሪር ወረደም ንዳል፡ እብ አርወሕ ልግበእ ወቀቲል ወቅት ብዙሕ ከሳር ዋዲ ዲብናቲ። ልግበእመ ደኣም ናይ ከሳር ሌጠ ኢኮን ለዐለ። መክሰብመ ዐለ ዲቡ። ክም ሽዑብ ወወጠን አደቀቤነ ወመቅደረትነ

አተረደ። ኤረትርዮ ለነአሸት ደውለት ወሸዐበ ሐድመ ዲብ እንቱ ለልትቀብብ ከም ኢኮን ለሐሰለ ዐውቴታት ለአክድ እግል። ናይ ረዩም ወቅሩብ መጽብረት ለዐለው ሰእየት ለአብተክ ጋር ቲ። ሽባብ ኤረትርዮ፡ እብ ስያሲያይ ወዐሰከርያይ ተዐሊም ደማኑቱ ለተአከደት እግል ፈታዩ ለረይሐ ወእግል አባዩ ለአርዐደ ለናይ ዲመ ታሪክያይት ሸሃደት ሽዑብ ወእብ ፍንቱይ ናይ ሽባብ ቲ። ሹባን ኤረትርዮ እሊ ለመስል ታሪክ እግል ልሸቀው፡ ምን ነፍሶም ወለዐል፡ ናይ ሕበር መሳልሕ ሽዐቡ ወሐኩመቱ ወፈንጉሕ ፈጅር ለህለ እሉ ህደፍ ምን አመረ ሌጣቲ። እምበል ዋመፅ ዓፍዩቱ ወአፍካሩ እብ መፅጸም ምን ሸቀ ሌጣቲ። እሊመ ሌጠ ኢኮን እተ አርወሕ ለትትሐዜ ዲቡ ወቅትመ እት ቅብላት አባይ ለለአሰቅር እቲ ወቅት ቲ። ለናይ ሐቅ ሕርየት ንዳል ምን ቀደም ሕርየት ለዐለ ንዳል እግል ልትፈንቱ ለኢቀድርቲ። ብዝሓም ሽባብ ለፊመ ወቅት ዲብ ክድመት ወደው፡ ለትወቀለት ተረት ዲብ አድመኖት ስያደት ወጠን፡ እት ዐማር ወጠን ቲ። እሊ እንብል ዲብ ህሌነ ክሉ ሽባብ ምስል በህለት ኢኮን፡ ከመ ሐቲ መረት ጀነራል ሰብሐት ኤፍሬም ዲብ ሐቲ ሙናሰበት ለቤለዩ “ራመ ሰፈር ለተረደ ነፈር ገይሱ ወበጽሐ፡ ” ዲብ እኩይ ወጨቢብ ወቅት ዲብ ህሌክ ለገይሰ ምንካመ ኢልትሐገል። እለ ደውለት ከም ኢናዩ፡ እብ ዐውል ብዕዳም፡ እት ቅብላት እንዴ ገአ ብዙሕ ለልትሃጌመ ኢትሐገል። ዓመተን ላኪን ለበዝሐው ሹባን ኤረትርዮ እግል ረዩም ወቅት፡ ለናይ ቀዳምያም ታሪክ እንዴ ወርሰው፡ እብ መትሰባል ወምህርት ስድት፡ እምበል በቲክ ሰእየት እንዴ ኢልትሐለሎ ከድሞ ዲቡ ለህለው ዘበን ተጠውር ወዐቦት ዲቡ ንትረከብ ህሌ። ከፈድል ሽባብ፡ ዲብ ዐቤት መርሐለት ትቅዩር ባጽሓም ክም ህሌነ ወሳይቅ ብናእ ወተዐሚር እግል ኖሱ ሰምዕ በሲር ጋብእ ህለ። ዲብ ደማኑት ነብረ ብጽሕት ለህሌት መርሐለት እቅትሳድየት ምን እንረኤ ዲብ ዐቤት መርሐለት ለበጽሐነ ዲብ ምህመት ለበ ንቅጠት ቲ። እለ ዲብ እነብር ህሌነ ቃልየት ወርዝቅት ወጠን አርዛቀ ዶል ልትሐንፈል እብ ፍሬ ተዐበትነ ዲብ ለሐሰት መርሐለት ክም እነብር እግል ሊዳነ ከምቱ ለለአሸክክ ጋር ኢኮን።

ዒማት፡ መጀለት መንእሴይ

ለኢተአትካርም ዐዳወት እዳረት አሚርኩ፡ ዲብ ረኣሰ ኤረትርዮ

1^ይ ክፋል

ዲብ ግርበት ለሐልፊነ ወሬሕ አፕሪል 2023 ሕኩመት አሚርኩ፡ “ሰትራተጅዮት አሚርኩ ዲብ ኤረትርዮ” በህለት (Integrated country strategy on Eritrea)” እበ ልብል አርእስ ዲብ ናይ ኢንተርኔት ሰፍሓተ እፍግርት ዐለት።

ለክቱብ እብ መሰሉል ህደፍ (Chief of Mission) ሰፊር አሚርኩ እት ኤረትርዮ ለዐለ ለትዳለ እት ገብእ፡ እግል እት ብቅት ለትከፊ ወለትሐልክ አጃንደት ስያሰት ለለአይድ አፍካር ለጽብዋ ዐለ። እሊ እብ አርት ዲብሎማሲ ለትከተብ ወእብ ጀሃዝ ቀድያት ካርጅዮት አሚርኩ (state department) ዲብ ዮም 5 ማዮ ለሐልፈት ዓመት እግል ልትነሸር ለትሰምሐ ክቱብ፡ ህደፍ እበ ለኢተአመረ አሰባብ፡ አሰክለ ሐልፊነ ወሬሕ አፕሪል እንዴ ኢልትነሸር ለጸንሓቲ። አዜ እግል ልትነሸር ለትሐዛብ ምስትንክር ለለአተብል አሰባብ ብዙሕ ሰኣላት ለለህርስ ቲ።

እሊ አሳስ ለአለቡ መትካሰሓይ ላቲ ሸክዋት፡ አተላላይ ናይለ እግል ዝያድ 20 ሰነት እምበል አትካራም ለአተላላት ጸብኢት ሕኩመት አሚርኩ እት ረኣሰ ኤረትርዮ ቲ። እብ ዐውል ስያደት ዱለት እድንያይት ሽንህትክ እግል ተአትምም ለገብእ ወለኢለአትካርም ጀርቤታት ቲ።

ብዕድ ምንኮር ለለአተብል፡ ለክቱብ እግል ሰልፍ መደት፡ አሚርኩ ምን ወሬሕ ሰብተምበር ሰነት 2021 እንዴ አንበተት እብ ገበይ ጀሃዝ ቤት ጎማት አምኑ፡ ዲብ ረኣሰ ሕኩመት ኤረትርዮ፡ “ዐዳወት ዲብሎማሲየት” (Disciplined confrontation) ክም ተበዐት ለለአምን ወልልእም ክምሰልቱ ለአክድ። ለሃዳፍ ጸብኢት ወኪይናት እንዴ ተሆገለ ለለአተላላ ክቱብ፡ ሰፋረት አሚርኩ ዲብ ኤረትርዮ ለአፍገረቱ ክምቲ፡ “ሕኩመት አሚርኩ እግል ሰትራተጅዮት ኤረትርዮ፡ ክም ሐቲ ናይ እለ መንጠቀት ዐድ ስምምት ወርግምት ወመሐምርጋይት ሰላም ወአምን ሰበት ገብኢት አትሐወኖት ደቅበ ወመሻረከተ ምስል ሕኩማት ስያሰት ወሚርሐት ለህለ እግለ ዶር ከፊዕ አውመ ዐንቀፎት” ዲብ ለትብል ክሉሊት ደገሰ ዕድር ለልዐንኩልቲ።

ቅቡልየት ቃትን ወዐዳለት ናይለ ቅዱም ለህለ፡ “እንድባዋ” ለልብል ዐገል ስያሰት እንክር እንዴ አዘምነ ምኑ፡ እሊ ዲብ ለዐል ለትሸርሐ ዛህር ዐዳዋት አሚርኩ ዲብ ኤረትርዮ፡ ቀደም እሊ ክቱብ እሊ መትነሻሩ ምስል ሕኩመት ኤረትርዮ ኩሉ-ኩሉ ለኢተህደጋቡ ጋር ክም ኢኮን እግል ልትአመርቡ።

ደሚነት ዲሙቅራሚየት ሐቅ ወድ አዳም እንዴ ትመሰለት ተአደፋርሰ ለትውፅል ወለትትመዬ አሚርኩ በክት ወሐቅ መስተቅበል ስያሰት ሽዐብ ኤረትርዮ ለትቀርር እንዴ ገብኢት እግል ትትረኤ ጀረቦተ ለወዴሐቲ። “አውለውየት ናይለ ስታት ሰትራተጅዮት” ልብል ለክቱብ፡ “እግል ብክእ አጅያል መስተቅበል ኤረትርዮ ወሐቅ ርኢስ ኢሲያስ ለትህሌ ሕኩመት ኤረትርዮ እግል አትዳለዮት ቲ!” ለልብል ምንኮር! ለለአተብል ጽብዋ ለከምክም ክቱብቲ።

እሊ ቅብብ ወመግህፍ እስትዕማር ወጨቅዋ ለለዐምም ዲቡ መብደእ፡ ለሐለት ወመትፋዋሽ ዲብ ከደን ብራቁ እበ ኢከሰሰ፡ መሳዋት ወሰያደት ናይ ድወል ዐለም ለልሐሽም ሚሳቅ ድወል መነዘመት ምጅልስ ቅራን ለከይድ ወለቀብብ ቲ። ምናተ እዳረት አሚርኩ እምበል አትካራም እግል እሊ ቃትን እሊ እንዴ ተዐምጽ ወትከይድ፡ ዲብ ለትፈናተዩ ድወል ዐለም ለህለ እድንያይ ዐሚም ሐዳም ጀሃት ወቅዋት ለልትቃወም መብዳእ ሳብት ለበን ጀሃት፡ እብ ሐለት እግል ትውረር ወተአተብርክ እምበል አትካራም ዲብ ትሸቄ ትረኤት ወትሰምዐት። እሊ እብ እዳረት አሚርኩ ለፈግረ ክቱብ እግለ አሚርኩ ዲብ ለሐልፈዩ 20 ሰነት ወዝያደን ዲብ ኤረትርዮ ለፈርደቱ ቅቡልየት ቃትን ወእስባት አማን ለአለቡ ቀራራት መኔዕ በይንመ ታይን ወለሐንፍል።

ሐር እንዴ አቅበልነ ምን እንረኤ፡ እሊ ለኢለአትካርም ዐዳዋት ምለዐል ኩሉ፡ ዲብ እዳረት ቢል ክሊንተን ወጀርጅ ዳብልዩ ቡሽ፡ እግለ እት ፍንጌ ኤረትርዮ ወአቶብዩ ለትበጸሐት እብ እትፋቅየት አልጄርስ ለትትአመር ናይ ረሰም ሕዱድ እትፋቅየት መርበዩ ወሀደፈ እንዴ ቀየረው፡ ለትወቀለት እዴ እግለ ዲብ መንጠቀት ቀር-አፍሪቀ አመቶም ለዐለት ወያኔ እግል ለሀቦ እተ ለጀረበው ዲቡ ወቅትቱ ለእንበተት።

ሕኩመት ኤረትርዮ ላኪን፡ እግለ አከይ-ፍዕል እብ እንትበህ ዛይድ እንዴ ታብዐቲ፡ ስያደተ ወሐቀ ለከይድ መሰምስ ክምሰልቱ እንዴ አመረት፡ ዲብ ሸረክ ከይነቶም እግል ትእቲ ኢቀድረት። እብሊ ሰብብ እሊ፡ ለኢተአትካርም ዓዳወት እዳረት ሕኩመት አሚርኩ እላተ ዝያድ 20 ሰነት ሐልፍት ህሌት።

ክም ክፋል ናይ እለ ጸብኢት እሉ፡ አሚርኩ ዲብ ምጅልስ አምን መነዘመት ምጅልስ ቅራን እበ ለህለት እግለ ሐለት እንዴ ትነፈዐት፡ ፍርድ መኔዕ አጽዋር ወብዕድ ቀራራት ወምስዳራት ጀዘ ዲብ ኤረትርዮ ወዴት። ለለአትፈክር፡ እሊ መኔዕ እሊ፡ እተ መደት ለህ ለዐለ ዝሃም አቶብዩ እብ አሳስ እትፋቅየት አልጀዛእር፡ ሕዱድ ኤረትርዮ እንዴ ኬደ ሐቆለ ተዐደ ወተዐዳወ፡ ክፋል ብዙሕ ምን ምድር ስያደት ኤረትርዮ ዲብ ሐንቲ መራቀብቲ አቲይ እተ ለዐለ ዲቡ ወክድ ለትፈረደ ፍርድ ዛልም ቲ። እብ ተውሳክ እብ አሚርኩ ወሰብ ሸርከተ፡ ሽባብ ኤረትርዮ ምን ዐዶም እንዴ ለአትሀርቡ ሐቅ ክትል ወዐለዮ እንዴ ለሀይባሆም፡ እግል ዐደ ለትዳፊዕ ወለትዐምር ቅወት ለኢትትረከብ ዲብ ኤረትርዮ እግል ልርአው ብዙሕ ሸቀው ወተምነው፡ ምናተ ማይ መሀጸው።

እዳረት አሚርኩ እትሊ ናይ ሐሰት ወአትካፍኦት ሰፍሓት ክቱብ፡ ዲብ ቅድየት መታጀረት እብ አዳም፡ አዜመ እግል ኤረትርዮ ዲብ ሳልሰይት ደረጀት ርትብተ ህሌት። እትረኣሱመ እዳረት አሚርኩ “ኤረትርዮ ሐቲ ምነ ዐባይ ኪደት ሐቅ ደያናት ለልትረኤ ዲብ ዐድተ” እንዴ ትብል ትሸርሐ። ምናተ ኤረትርዮ እብ ቀውምያት ብዙሕ ወኩለን ደያናት ለተአሰሰት ወሸዐበ እብ ውፋቅ ወመቅሬሕ ለነብር ዲብ ዱለት ክምሰልተ ኩሉ ለልአምረ አማንተ።

ልተላሌ...




እሊ ሮሻን እሊቱ ለቀደር ደደፍ ዘመን ንእሹ እግል ለሐልፍ እቱ ለሐሰብዩ። ለጆኔታይ ዲብ እሊ አካን እሊ እግል ሰለሰ ሰነት ለትትሐመድ ዕቢያት ረክበዩ። አክል አሕድ ክመ ዲብ መስር እተ ዘመን ለሀይ ለዐለት ዕቢያት። ዲብ እሊ ወቅት እሊ እግል ሰነብ ምን ኢጉብእ ምን ሕቅፍ እሙ ልትክሬ ይዐለ። ዲብ እሊን ሰለሰ ሰነት እሊን እት ልብ ዛዩ ጡል ዕምረ ለኢልትመሰሰ አሰር ሐድግ እሊ። ረሕመት እም ዘርአ ዲብ ወፊተ ወረሕመት ጠባ ምነ። ምን ለዐል-ለዐል ምን ኢጉብእ እብ ክሰሩ ሰልፋይ ዘመን ንእሽ ደደፍ ብዙሕ ለለክትሃይ ይሀለ። በህለት - ክም ኩለን ዘመን ንእሽ - ድቡእ ምስጢር ወለውቀት ዐባይ ተ ለዐለት ወእምበለ እት ሐን ዓቅቢተ ዋድዮቱ ወእባ ለሐዘቱ ገበይ ትመርሑ ወተሐሸኸኸ እሊ ለዐለት አልሃት ብዕድ ለደልዩ አሮተመ ይዐለ። እግል ልትባህል ለቀድር ጋር ሀለ ምን ጉብእ። ለጆን እብ ሸፋግ ለዐቤ ዐለ። ወክለ ሓለቱ ልብ ለፈትዮ ዐለት። እግል ዛዩ ዓማት ለውቀተ ወትር ዕንታተ። ወእግል ናፈ ወኹን ለፈትወ ለለሀምን ዲብ መርዓቶም ጋብእ ዐለ።

ምን አሕድ ልትሻቶፋ ልሰዑሙ አሳሚ ወህዛዩ ወመጋይስ ለክትላሙዱ ዐለው። እት ደንጎብ እት እሊ ናይ ሰልፍ ዘመን ንእሹ ለኢልትቀብብ ብዙሕ ሓጃት ተዐለሙ። እግል ዛዩ እብ ከፎ “ይመ” ክም ልብለ አመረ። ዛያመ እብ አንክረ እግል ብሻውሮ “ይብ” ክም ልብለ አልመደቱ። ላመ እናስ እሊ ሰምዐ ምን ጉብእ። እብ ፈርሐት ወለውቀት ልትከበተ ምኑ ወክለ ለኖራይ መፈተይ ገዱ ረኣተ ብዙሕ ሰኔት ልተምኔ እሊ ዐለ። እሙ “ረዕ” ለትብል ዘዐት እግል ተአጽብጡ ብዙሕ ትጸገመት። ረሕመት ረቢ ዲብ እሊ ፍቱይ ውላዱ እግል ትድመን ቀደም ስነቡ ወዶል ፍዝባቱ እግል ሊበለ ትጠልብ ምኑ ዐለት።

ወድ ሰለሰ ሰነት ክም ገበኣ ሕቅፍ ዛዩ ትከረ ምኑ ከዲብለ ቁርፈት እሙ ዲብ ታክቡ። አው ዲብለ መጋሲት ወለ ደዋዊን እንዴ አተንክብ እት ቀበትለ ቤት ኬን ወእንሰር ልብል። ደለ እሊ ረአ እግል ለአምር ወልክሸፍ እት ኩሉ እተ ቤት ለዐለ ሓጃት ተመህ እት ልብል አስክ ልትዕብ ለአንገይ ወምን ሐዲስ እትሊ ምሽዋርለ በሐስ ወሕፍዝ ዋሰል። አምዕል ሐቱ ብሻውሮ ለመሆንድስ እግል ትልህዩ ለነፍዑ ግሩም ሓጃት። ክም ፈረሰ ናይ ዕጩይ። አልመ ዐንቀሩ ተአግህጽ። ወዐረብዮት ሐርብ ንኢሸቲት አምጸአ እሊ። እብ እሊን ሓጃቱ እት ልተልሂ እት እዲን በይኑ ነብር ዐለ። ህቱ ለቀውደ እዲኑ ክምሰል ሐዘ ለመረሐ ወእባ ህቱ ለትሸነህዩ ገበይ ለነደአ እዲኑ ደለ እሊ ትሸነህ ግብኢ እግልዩ ልብለ ወትጉብእ እሊ። ፈርሰል ዕጩይ ናዩ እዲና ወሰእዮት ዐለት እሊ። ወለ ለአግህጽ አልመ ናዩ እዲን ወጠመዕ ዐለዩ እሊ። ላመ ዐረብዮት ናይ ኖስ ሸንህት ወምራድ ዐለ እሊ። ዳገመ እሊን ምን ጉብእ ህተንመ

ተመህ ቀደር



ለኣትሃጅካህ። አዋምርመ ሀበዮን ምን ጉብእ ጠይዓሁ ዐለዩ ወዶልከ ዐባዩ ለኢለአሙሩ ምስጢር ጀማዳት ከሸፈ እሊ ዐለዩ።

እተ ወቅት ለሀይ ቱ “ጃሙርከ” ምን ክልኣት ውላድ አሰል ሰኔ ላቶ አብ ወእም ምን ጆንስ አርመንት ትወለደ። ደደፍ ረዕ እብ ፈርሐት ዐባይ ትከበተዩ። ወቤተት ዲብ ሰክብ ሀበዩ። ከምን ሰልፎም ሰኔት ምስንዮት አሰሰው። ደደፍ እግል እሊ መለሀዩ ምን ቅያስ ወለዐል ፈትዮ ሰበት ዐለ “ጃሙርከ” ዘመን ንእሹ ምን ሕቅፍ ደደፍ እንዴ ኢልትፈንቴ ወክም ጽላሉ አሰሩ እት ጉብእ ወእት ወቅት ሰነቡመ ምስሉ እት ሰክብ ሓለፈዩ። እብ ክርኑ ለዋዕም ስሙ “ጃሙርከ” ክምተ ተማም አልመደዩተ። ነብሐ ምን ጉብእ ልትላከዩ ክም ሀለ። ወዘነቡ ለሻለሸ ምን ጉብእ ለአርሕብ እቡ ክም ሀለ አመረ። ምናተ ለለአሰፍ ጋር ዐለ ምን ጉብእ ዘመን ንእሽ “ጃሙርከ” ለተሐምርግ ሰንዐት ኢትሰኣነት። ለለአግህጽ አልመ ክለ ረኣተ መላእክት ትደንግጽ ወለውቀቱ ወፈርሐቱ ልትሐምረገ ዐለዩ። ዶል ለእሉ ልርኤተ ለዕንታቱ ለአፋብዝ ወነቤሕ ወገኖቡ ትትካረብ ወለሀጅም ወሰኬ። እሊ ሓለት እሊ ደደፍ ለአልማሁ አስክ ኢሐብዐ በታተን ትጠልቁ ይዐለት።

ሐራም ዲሞምተ ልትፈናተው ይዐለው። ደደፍ እት ዐራቱ ዐርገ ምን ጉብእ ጃሙርከ እተ ባኩ ለአግሕም። ትም ዋዲ እት እንቱ ትገሰ ረአዩ ምን ጉብእ - እሊ እግል ሐት ሐቱ ዶል ቱ - ህቱመ እተ ቀደሚሁ እንዴ ትገሰ እንገራቱ ለአማድድ። አውመ ህዩ ዐደድ ፈታሁ እግል ለአርእዩ ቀርብ ዲቡ ከኣተ እደዩ ወለ መላትሕቱ ልልሕሱ። ዲብለ ጆኔነት ምስሉ ልትዛወር ወዛዩ እግል ተኣትፈሰሑ እብ ጀልበት እተ መራትለ ጆኔነት ነሰኣቱ ምን ጉብእ ምስሉ ለዐርግ። ምን ጀልበት እብ ሐንግሎም አሰክለ መራት ትሻበበው ምን ጉብእ ለአጽለቶም ልርኡ። ጃሙርከ ምን ነቤሕ ኢበዋር። ደደፍ ላቱ እሊ ንኡሻይ ግሩም እሉ ለመሰል እተ ቀበትለ መራት ሳክን ለሀለ እቱ ልትዐጀብ ወልትፈከር ዐለ።

ምድር ቀደም ዶል ጉብእ ለሰመ እብ ጨቅ ብሪቅ ናይለ ሰራይር ትትመለእ። ዕንጭርርሓይለ ጸሓይ እግለ አግያማትለ ልሐተ ክም ሰንከዩ። ለምድር እብ ዒድ ሸቡቱ ለአሕተፍል። ወለዕጩይ እብ ዕንባባታት ወለትፈናተ ፈርዖት ልትሰርጌ። ወለ አልባብለ አዳም ረሕመት ወፈተ ልትመለእ። እተ ወቅት ለሀይ ትልህዩ

እብ ጅላብ እተ መራታት ምን ቅያስ ወለዐል ትበዜሕ። ለአጀኒት እምበል ሐዊናይ ልባስ ዐውረቶም ሰትር እብ ብራቃቶም ልትጠለቁ። ኹን ወናፈ ምን ጀልበት ዲብለ መራት እንዴ ትከረው እብ ማይ አሕድ ለሃጽፎ ወኩረት ዲብ አሕድ ዋግሮ ወለሐምብሱ። ደደፍ ህዩ እት መጦር ጃሙርከ እንዴ በዋረ መብሉጥ እት እንቱ እብ መቅደን ለአተቃብሎም። ወርሑ ተሐልፍ ምኑ ከእግል እሙ ክምሰልሆም እግል እውዴቱ ልብለ ወእት ወሪደ ጉብእ እሊ። ህተ ህዩ። እብ ሃባጡ እንዴ ረፍዐቱ ከምነ አምዲቱ ወተሐት ዲብለ ማይ ትቀምሹ። እብ እንሩ ዲብለ ማይ ጨብረቅ - ጨብረቅ እት ልብል ወሰኔ ልወቅ እት እንቱ ልተልሂ።

ዶል ለተማም ምን ትልህያሆም ጸግቦ ወልትዕቦተ ክሎም ዐድ እንዴ ዐቅበለው ቀደምለ ሮሻን ለህሌት ናይ ሐጋይ ጆኔነት ዲብ ልትገሰው። ዛዩ ዲብለ ዴዋን ክም ትገሌት ደደፍ። ኹን ወናፈ እንዴ ትከለለው ልትጋሰው እሊ። ጃሙርካመ እንገራቱ እንዴ ማደደ እተ ቀደሚህ ለአግሕም እሎም። ዛዩ ድግምለ በሓሪ ለጀልበቱ እንዴ ትሳበረት ለአምዋጅ እት ረኣሰ ሉሓይ እት እንቱ እንዴ ሸትፈቱ እት አዳም ለአለብ ጀዘረት ለሰክፈቱ እሊ ትዳግም እሎም። ወለ በዐለ ጀዘረት ላቱ አርዌ እንዴ መጸዩ ክም ከፎ ምክራዩ እግል ለአቅዌ ክም ሐዘ ተኣስእሎም። ምናተ ሐር ለእናስ ሙእምን ወእብ ገበዩ ጋይስ ወምን ፈተሻ ፈርዑን ክምቱ ዶል አመረ። አብሸርከ ክም ቤለዩ ወመርከብ ዐባይ ምነ ቀለ ወጠመዐ ዐፍሸት እንዴ መልካዩ እሉ እብ ሰላም አስክ ዐዱ ክም ሳርሐዩ ትሓኬ እሎም።

ደደፍ ላቱ እብ እዘኑ እንዴ ኢጉብእ እብ ክልኤ ክሐላት ወገራይም ዕንቱታቱ ለለአተንሰዩ ዐለ። ሰኔ ልወቅ ወመፈተይ ዐለ። ከምን ጉብእ ቱ እግል እሊ ክሐል ዕንታቱ ጀነ በዐለ አንፍ ረዩም ወውጡይ ወበዐል መትሰሕቃይ አደብ ወፈታይ ደኣል ላቱ ሕጻን ለኢፈቱ? ምን ልትሃይ ወምን ለአዝም ፍቱይ ቱ። ምን ልተልሂ ወምን ልትገሌ ክልዶል ፍቱይ ቱ። ምን ልትቀጽብ ወምን ረዴ ዳእመን መፈተይ ቱ። ረቢ እግል ፈተ ወለውቀት ወትልህዩ ሌጠ ለክልከዩ መሰል።

ክም እነ ዲብ እንቱ ወድ ሐምስ ሰነት ክም በጽሐ እዲን ገሌ ምነ ሓብዐቱ ምኑ ለዐለት አሰራረ እግል ትቃልዕ እሉ አንበተት። እተ ወቅት ለሀይ ኹን ወድ ዐሰር ሐቱ ሰነት ወናፈ ወድ ዐሰር ሰነት እንዴ

ጉብአው ለናይ እብትዳኢ ተዕሊሞም እትሙማም ዐለው። ኹን መድረሰት “በታሕ” እብ እንዴ አልተሐቀ ዲብ ለዐለ ደረጃት ዕልም እንዴ ተዐርረ ዲብ ዕሉም ዲን ወአኽላቅ ወሰያሰት እግል ልትብገስ ሐረ። እሊ ህዩ ለባበት ወዕልም ፈቱ ሰበት ዐለ ወወዘፈት ናይ ዲን ወቀዳእ (ፍርድ) እግል ልርከብ ረቅቦት ሰበት ዐለት እሉቱ። ናፋ ህዩ ፈን ወረሰም ፈቱ ሰበት ዐለ እብ መዕሀድ “ኹፋ” ናይለ ፍኑን አልተሐቀ።

አዜ ተረት ደደፍ አስክ መድረሰት እብትዳእዮት ለገይስ እቱ እዋን ገበኣት። እሊ ምን ጉብእ ግድም ምን ዛዩ ወጃሙርከ እንዴ ትፈንተ ወምነ ነብር ዲብ ለዐለ እዲን ሕልም እንዴ ፈግረ። እት አምዕል አርበዕ ሳዐት እትለ ኢለአምሮም አጀይናት እንዴ ተሓበረ መግድእ ቅራኣት ወክታብት። ሕሳቡ ሀንደሰት። ዲን። አኽላቅ። ወተርብዮት ወጠንዮት እግል ልድረስ ወጅቦ ዲቡ።

እተ ሰልፋይት አምዕሎም ቀደም ኩሉ ለትባህለቶም ዘዐት። “ሸሙይ ልብኩም እንዴ ከፊኩም እግል ተኣተንሱ ብእትኩም። እሊ ለኢወደ ምንኩም እዘን ጀነ ንኡሽ እት መላትሕቱ ሰበት ቱ መላትሕቱ አስክ

ጸሌዕ እግል ልትዛበጥ ክም ቱ እግል ተኣምሮ ብእትኩም” ትብል ዐለት። ደደፍ እግል ሰልፍ ኢነት እት ሐያቱ ህቱ ወሞረ ቅብላት አሕድ በዋረው። ምናተ እተ ድራሰት ንዮት ሰኔት አርኢ። ወዲብለ ልትሀዩቡ ለዐለ ድሩስ ናይለ ግርም ህግዩ ሄሮግሊፍዮት ረቅቦት ውቅል አርኢ። ወዲብ ክምሰል ጀምዕ ወአንቀሶት ለመሰል መሳእል ሓሰብ ፈዳብ ገበኢ።

ሙደርሰለ አኽላቅ ዲብ ልብ ደደፍ ዐባይ አካን ዐለት እሊ። ለሙደርሰ ለትትፈረህ ወትትፈቱ ሸኽሰዮት ዐለት እሊ። ለተባሰም ለእለ ወዴ እተ አልባብለ ደረሰ ፈተ ወጠመእኒት ተኣቱ ዐለት። ምን እሊ ወኬንመ እግል ደደፍ ክም ፈትዩ ለወዴቱ እብ ኩሉ ሰፋቱ። ለገርቡ ርሹድ ወለ ሙሉእ መሻድጉ ወለክርኑ ዕክት እባሁ አቡሁ ብሻውሮ መሰል ሰበት ዐላቱ። ክም እሊ ልብል እት ሀለ ምን ኩሉ ልቡ ወቀልቡ ታብዑ ዐለ። “ስምዖ። ለእሙር ለቤብ “ፋቁምን” ሚ ልብል ዐለ መሰለኩም። ክምሰል እሊ ልብል ዐለ - ሩሐ ዲብ ሰመ ትትቀደስ - “ምን ቀደብ ረቢ እግል ትድሐን ትትበኣስ እት ህሌክ ምን ዕናድ ደገዛ። ወእተ ክምሰልሁሙ። ሕዲን አደብ ክፍኢን ወመግለል ቱ ልብል ዐለ።

ተባሰም

ዎሮት እናስ እሊቱ ሞተት ምኑ። ምናተ ብዙሕ ኢትአሰፈ ዲቤ። ሐቆ ገሌ አምዒላት አድጉ ምን ሞተ። ሰኔ ሐዝነ ወትረበሽ ወአሻደር ህም ወቀም ትረኣ ዲቡ። ገሌ መሳኒቱ እሊ ምን ረአው ክም እነ ቤለው። “እለ እንተ ዐጁብ እንተ። ቀደም እለ እሊትክ ምን ሞተት ዐደድ እሊ ለአዜ ዲብ ሞት እሊ አድግከ ለሐዘንካሁ ወተኣሰፍካሁ ደረጃት ኢበጸሕክ ዲቤ። ከደሐንካቱ ከፎ ትረክብ ህሌክ ኡማን ኢትወዴ” እት ልብሉ ትሰኣለው። ህቱ ህዩ ክም እነ እት ልብል በልሰ ዲሞም። “አምዕል ለእሲቼ ሞተተ ለገወውርዬ እንዴ መጸወኒ አብሸርከ ኢትትኣሰፍ። ምነ ለተሐደሰ እሲት እግል ነኣትህዲነ ቱ ቤለወኒ። ወገለድ በአው እግልዬ። ምናተ ለአድግዬ ዶል ሞተ እብ ክምሰልህ ገበይ እግል ልሸጀዐኒ ወለኣትራሰዐኒ እንዴ ቤለ ለሸቤኒ ነፈር ዎሮትመ ኢረኤኩ። ከብዙሕ ምን እትኣሰፍ ወሐዝን እት ገበዩ ህሌኩ። ኢመሰለኩም?” ቤለዮም።



እም ዓምር

ሸዐብን እግለ ሐዋናት ክናያት አውመ አሰማይ ገለድ ለሀዩበን። እግል መሰል እግል ሀበይ ወድ ነባይ ወእግል አድግ ወድ አፍሬት ወእሉ ለመሰል። እት ሸዐብ ዐረብመ ክም እሊ ለመሰል ጋራት ልሙድ ቱ። መሰለን እግል አድግ አቡ ሳብር ወእግል ከራይ እም ዓምር ለልብል ክናያት እቡ ነቁሞም።

አምዕል ሐቱ ከራይ ጀማዐት ሐቱ እግል ልቅቶለ ክፈፍ ምን ቤለው። ልብ ወዕንተ ቃውዮት እት እንተ ዲብ ቤት ዎሮት እናስ አቱት ምናም። በዐለ ቤት ህዩ ሰይፋ እንዴ ሐርጠ ፈግረ ዲሞም። ከለከራይ ምንኩም እት ተሀርብ እሊ ሸፍርዬ ደሐን እት ተሐዜ ግርቀቱ ህሌት። ወሐሰብዬ ጋብኣት ምንኩም ሰበት ህሌት። አዜ ዎሮት ምንኩም ዶል ተምትመ እግል ሕድ እግል ነሓይስ ኢኮን ቤለዮም።

ለጀማዐት ለእናስ እብ አማን ልብሎምተ ክም ሀለ ምን ገዱ ሰበት አመረው። ፈርሀው ምኑ። ወእብ አሰርም ትም እት ልብሉ ዐቅበለው። ለእናስ ሐቆ እሊ እግል ጋሻይቱ ሐሊብ ወነብረ ሐረባዩ ወሰኔ አጽገበዩ ወተማም ክም ተሐደረዩ ሰክበ። ህተ ህዩ ብት ትቤ ዲቡ ወኩብዱ እንዴ ፈድዐሰት ለደሙ ጨመት ወቀትለቱ። ሐቆህ ምን እሊ ደመ ሕትግርት እት እንተ ክም ፈግረት ለጀማዐት ክም ርአው ዐ'ረው እብ ከቀትለው።

ከመሰል እግለ ሰኔት እት ደኣነህ ለወዴ ወእግለ ለኢለኣስታህለ ለለህደብ ፈግረት እቡ።

(ሰኔት እግል ኢለኣስታህለ ለወድዮ። መድሕናይ እም ዓምር ለረክበት ትርከቡ) ትብህለ።



ነፈሰ ወድ ዕትማን

ዓዳትነ ነጻምር

ነፈሰ ወድ ዕትማን ወኪላዊ ሊትማን እብ ክሰራሉ ሓልዮት፡ ዓዳት ወኪላዊ ትግራይት እተ ወደዉ በሐሰ ወድራሳት፡ ክምሰልሁመ እት ደረጀት ጥባባት ለኣብጸሐው፡ ከዮም ክብት ትግራይት እግል አጅያል ለሐዲሰ ጋብእ ለህለ አክትብት፡ እግል መጽእ አጅያል መትሃገየት ትግራይት ዝሕረት ዐባይ ቱ። ነፈሰ ወድ ዕትማን ወኪላዊ ሊትማን ህዩ ዲብ ተእሪክ፡ ዓዳትነ ወሕላይነ ለአግደዉ ዶር እብ ቀሊል ለልትረኤ ኢኮን። ከሰፍሐት ፈን ወግዳት እሊ እት አክትብት በዲር ለህለ ርዝቅ ህግያነ ክሉ አዳም ጀላብ እግል ልርክበ፡ ለአምሩ ወልትነፈሰ እብ፡ እትሊ ዓሙድ እሊ ምነ ብዞሕ ጽበጥለ አክትብት ዲብ ነሐሬ እንቀድም እኩም ህሌን። ከእግል ዮም'መ ምን እሊ አክትብት እሊ ለአዳሌናሁ ጽበጥ ጀበእ እምለኩም፡ ከቅራኣት በኪተት፡



ኢኖ ሊትማን

ምን ድግም ቀዳምያም

ወድ ህመም ለቀትለ ሐርማዝ

ህመም፡ እግል ንኡሻይ ወልዱ እት አካን ሐቲ ሓድጉ ዐለ። ለወድ ህመም እት አካን በይነ ግሱይ ዲብ እንቲ፡ ሐርማዝ መጽአዩ ከእበ እግሩ ኬደዩ ወሽሙይ ደዐከዩ ከቀትለዩ። እግል ህመም ህዩ መውዲታይ ነድኦ ዲብ ከወልከ ሞተ እት ልብል አሰአለዩ።

ህመም ህዩ፡ “ወልዬ ምን ቀትለዩ?” እንዴ ቤለ እግል መውዲታይ ትሰአለ። ለመውዲታይ ህዩ፡ “ወልክ ሐርማዝ ቀትለዩ” ቤለዩ። ህመም ላኪን፡ “ያየ፡ ያየ፡ ወልዬ ላተ ሐርማዝ ቃትሉ ይህለ! ወልዬ በስ ዐጣል ቃትሉ ህሉ፡ እሊ መዋዲት አጣልቲ!” እት ልብል ወነዌ ጌሰ ከእግል ዐጣል መድብ እብ ቃታል ወደዩ፡ መርባትለ ወልዱ እግል ለአቅስን።

ህመም ወልዱ፡ ሐርማዝ ክም ቀትለዩ አምር ምንመ ዐለ፡ እግል ሐርማዝ ሒለቲ ምን ኢረክበ፡ ለመርባቲ እት ዐጣል አመስመሰዩ ከእሉ ቃትለ። ወአስክ እለ ሃድል ዮም ክምሰልሁ ገብእ ህለ። አዳም'መ ዎሮት ምኑ ለልትደቀብ ነፈር ዐገበዩ ምን ገብእ፡ ሒለቲ ሰበት ለሐግል፡ እት ምኑ ለልሐውን ቀንጽ። ከእብ መሰል፡ ‘ገብር ሚ ወዴ፡ ጤል ቤለ ህመም’ ልትበህል።

ዲብ ዐረብመ፡ “ትሩድ ሐምቅ በሌዕ” ለትብል መሰል ህሌት። እለ መሰል እሉ፡ ደለ ድቁብ እግል ሐዋን እት ለአትፋርህ ወጨቅጥ፡ አክረቱመ ሰኒ ሐግረ እቡ ምን ገብእ፡ ቀትሉ ከምን ምድር ለአሰርቲ።

ድግም ክልኦት ሰብ አዱግ

ክልኦት እናስ እት ገበይ ሕድ ትከበተው። ወክል ምኖም አድግ ዐለ እሉ፡ ከለሰብ እግል ሕድ ትሰላለመው። ለአዱግ ህዩ እት አፍ ሕድ እንዴ ደነው፡ እግል ሕድ ጸነው። ለዎሮት እናስ እግል መለህዩ ክእነ እት ልብል ትሰአለ፡ “ሕናዲ እግል ሕድ ትሰላለምነ ለአዱግ ህዩ እግል ሚ እት አፍ አድሕድ ደነ?”

ለህይ ህዩ፡ “እሊ ኢተአምር! አዱግ ዎሮ አድግ ፈዱብ እት ረቢ ልእኩም ዐለው፡ እቲ እግል ልዋረዕ እሎም በህለት፡ ረቢ ምን ሐንቴ አዳም ሕር እግል ለአፍግሮም። “ከለአድግ ለትለኦክ አሰክ እለ እቅቡል ኢህለ? እንዴ ቤለው እግል ሕድ ልትሰአሎ ህለው” ቤሎ። ከአዱግ እብለ ጋሪት ሕድ እግል ልትሰአል እት አፍ ሕድ ደንን ልትበህል።

ምን እሊ ለእንፍህመ፡ ክል ፍጥረት ሕር እግል ትግበእ ክም ትሰፍለል ወትትሸነህ ተ። እለ ዓደት ጸነዮት ሕድ እት አዱግ ክል ዶል ትትረኤ። ብዞሕ አዳም ህዩ ተአትፈክር።

ምን ሕላይ ቀዳምያም

ሕላየት እናስ ዎሮት፡ እግል ገላይዶስ ወድ ሼካይ

ሐቃቲ እለ ቤት-ጃክ ምንመ እለ ትጃርብ እብ አሰቦሕ ጸብጠ አሰክ አመቃርብ ወሐል ገኣክ ዲቦም ኩሉ ረአሶም ሻርብ ሰይፍ ገኣክ ዲቦም መጋባቶም ጋርብ ርሳስ ገኣክ ዲቦም አግጹቶም ቃልብ ሐየት ገኣክ ዲቦም ለድቢት ለአትጋልብ እሳት ገኣክ ዲቦም ዐልመት ለሐጋይ ካርብ ግድም ሳልስ ወራርካቲ ለጥለብክ ዓልብ ዘማት ወክድ እኩም ወዘማት አመቃርብ።

ምን ገጽ 4 ለተላላ

መቃበለት ርኢስ



ሰኣል፡ ሓይሰ ርኢሱ እት ደንጎበ እግል ሽዑብ ሱዳን ክም ሒ ሽዑብ እትለ መደት መሻክሉ ለትሓልፈ ልእክት ምስንዮት ሰበት ተህሌ እግልኩ፡ እብ ህግዩ ዐረብ?


ሽዑብ ኤረትሮዩ እግል ሽዑብ ሱዳን ተአዩዱ ሽፊሕ። እተ ሐልፈዩ 30 ሰነት ንዛም “አኻዋን” እት ሱዳን ለአጅረዩ ደማር እበ ከሰሱ፡ ሽዑብ ወሕኩመት ኤረትሮዩ፡ መጸጸት ናይ ሽዑብ ሱዳን ክም ተአመጽጸም ሽርሐ ጸንሓም ቶም። ሐቆ መትወርካይ ንዛም “አኻዋን” ምን 2019 አሰክ እሊ ዮም እንርእዩ ለህሌነ ተዋልል ዐዛብ ህዩ፡ ሱዳን ተሓልፋ ለህሌት መሻክል፡ እግል ኤረትሮዩንመ ክም መጸጸቶም ተ ለትትሰምዖም። እግል ሽዑብ ሱዳን ተእዩድነ ዲብ እንሸፊሕ፡ እት ክእነ መሰል ተዋልል እት መሰኡሊን ወቅዋት ሲዮስት ለቀደምናሁ ውራቅ ህለ። እት ምፍጋር፡ ምውዳቅ፡ ቅብለት ወግብለት፡ ሽዑብ ምስል እንዴ በጥራ፡ ለሐልፈ ንዛም ክም ገልጸኦ፡ አካነቲ እግል ልጽበጥ በክት እግል ልትህየቡ ዐለ እሉ። እብሊ ህዩ፡ ምን እለ ናይ መዐደዩት መርሐለት፡ እት በር አማን እግል

ልትዐዴ ቡ ለልብል ረኣይ ብነ።

ለበር አማን ህዩ እት እዴ ሱዳንዮን እግል ልግበእ ቡ። ሽዑብ ሱዳን ቲ ለጅርበት ክሪት ዲቡ ህሌት። ገቢል ሱዳን ምነ እግል መትካፋል ሰልጠት ወርዝቅ ለጉብእ ጅግራታት ለከሰበ ሐበት አለቡ። ሽዑብ ሱዳን ምን እለ ትልህዩ እለ በራ ቲ። አዜመ እለ ሕውጽት ለህሌት ምሽክለት ናይ ሽነተ መሰኡልየት እብ ዐቢህ ናይ ሽዑብ ሱዳን ቲ። ሰዳይት ገወውር፡ ኤረትረዩ ውበዕድ ድወል ክም ካልኣይ ሸይ ለትትረኤ ቲ። ለሰልፋይ ፊፍዓይ እማነት ሽዑብ ሱዳን ቲ። ገቢል ሱዳን አሰክ አዜ እብ ፈዛዐቲ ወሰብሩ እግል ኩሉ መታክል እንዴ ከህላቲ እትለ መርሐለት አዜ ባጼሕ ለህለ። ግረ እላመ እት በር አማን እብ መሻረከቲ ወካድሙ ቲ ለበጼሕ። ሰበት እሊ፡ ፈዛዐት ሽዑብ ሱዳን ምስለ ህሌናሁ ተዋልል ለትትሳነን እግል ትግበእ ቡ። እተ ሐልፈዩ ሰለሰ-አርበዕ ሰነት ለትረኣ ፈንጨጋር ክቡት ኢኮን። ሰበቡ ህዩ ለፈንጨጋር ምን ገበይክ ሰበት ለአሽክፈኩ። ሽዑብ ሱዳን ምን ላዋሽ እደይ ቅዋት ካርጅ እግል ልትሓፈዝ ቡ። እት ፍንጌ ዴሽ ወቅዋት አደዐም አልሰሪዕ፡ እት

ፍንጌ ዴሽ ውበዕዳም ሰሉሓም ሐረካት፡ ለጸንሐ ቅደይ ሕሉል እግል ልርክብ፡ እትለ መርሐለት መትዐደዩት ኤማን ወፈዛዐት ገቢል ሱዳን ለአትሐዜ። ሰበቡ ለመሰኡልየት እብ ዐቢህ ናይ ሰበት ቲ።

እትሊ አውካድ መእከይ፡ ሽዑብ ኤረትሮዩ ምስል ገቢል ሱዳን ባጥር ክም ህለ እግል አክድ ሐዜ። ምን ብጥረት ምስል ሽዑብ ሱዳን ሕርያን ብዕድ አለቡ። ናይ ሕርያን አው ምራድ ቅድየትመ ኢኮን። እለ ታሪካይት መሰኡልየት ቲ። ዮመቲ ምስል ገቢል ሱዳን ለእንበጥር እተ መደት ቲ። እብ ረኣይን፡ ፈዛዐት ሽዑብ ሱዳን ምነ እንሰእዩ ወለዐል ቲ። ሽዑብ ሱዳን እለ መርሐለት እኪት እብ ኤማኑ ክም ልትዐደያመ ሰእዩቼ ወሰእየት ሽዑብ ኤረትሮያ ቲ። እሊ ክለቅ ለህለ ነዐር ወመትፈናታይ ለልኦንትህዞ እትለ ወእት ሎህ ኢልትሐገሎ። እብ እምነቼ ምን ገብእ ወናይ ሽዑብ ኤረትሮዩ፡ ሰዳይት ኩለን ድወል ግዋረ ውበዕዳም እብ ሕርየት ወውሕደት ሲዮደት ሱዳን ለልኦምኖ ጀሃት ኔፍዓት እት ገብእ፡ ባልሖት ቅድየት ሱዳን ላኪን እብ ዐቢህ ናይ ገቢል ሱዳን ቲ።



ደንደን ወተኣሚናት ካስ ሕርየት ነስከው



*ደንደን እምበል በዲል መተልህየት ... *

እግል ገማል 32ይ ዲድ እስትቅላል ኤረትርያ እት ፍንጌ ፍረቅ ኮበራት እግር አቅሊም ምግብ ገብእ ለአሰመነ ጅግራታት፡ ሰንበት ዐባይ 7 ማዮ ብዝሓም ፈተች ርዶደት እት ሐድረወ መናሰበት እት ስታድዩም አስመረ ክም ተመ፡ ፅላቃት ዓም ፈደሬሽን ኩረት እግር አቅሊም ምግብ ሐበረ።

እስልፍ ለተልህ ፍረቅ ማይተመናይ ወዕዳገ-ሐሙስ ዐለው። ማይተመናይ እት 31 ደቂቀት መዳፍዎም ሻም ጴጥሮስ እብ ከርት ቀይሕ ሰበት ትጠረዝ ምናም፡ ለተርፈ ዝያድ 60 ደቂቀ ትልህየ እብ ዐስር መተልህያይ እግል ልጋብሆ ትጀበረው። አስክ ፅርፍ ጎል ኢትረከቤ ሐቆ ፅርፍ ላኪን፡ ፅዳገ-ሐሙስ ዲብ 51 ደቂቀ ጎል ሰበት አተው፡ ሳልሳይ ዕዉት ካስ ሕርየት ገብአው። ጎል ለአተ እሉም ህይ፡ ሮቤል ክብሮም ቱ።

ሐቆ እለ ትልህየ አዋልድ ደንደን ወተኣሚናት ተሌት። እትለ ትልህየ አዋልድ ፈሪቅ ደንደን ካስ እግል ልንሰእ ሐቆመ ገብአዩ፡ ናይ 4-0 ዐውቱ ለአትሐዝዮን ዐለ። ሰበት እለ ለትልህየ ክም ትደቀበን ሸክ ይዐለ እለን። አወላይ ሾት እምበል ጎል ፈጊረን ህይ እግል ደንደን ለኢለአከሰብ ተየልል ትክለቀ።

ሐቆ ፅርፍ ላኪን፡ ፈሪቅ ደንደን እብ ቅደር ለአተያህን ሄርሞን እዮብ ወዳናይት ሰለሙን አርአሮት ጎል ሰበት አተዩ፡ ፈሪቅን አርወሐት በልሰዩ ዲቡ። እት 83 ደቂቀትመ ሄለን ሚካኤል ጎል ሰበት ሰለሰት ፈሪቅ ተኣሚናት እት ወርጠት ትካረ። ምናተ አዋልድ ደንደን ራብዓይ ጎል ሰበት ኢረክብዩ፡ ተኣሚናት ቅሉባት ዲብ እንተት ካስ ሕርየት ትሆገለዩ። እት ትልህየ፡ ሄለን ሚካኤል ናይ ደንደን ለሌሰት መተልህያይት ነስከት።

አክረቱ፡ ለብዝሓም ፈተች ኮበራት እግር ልታከወ ለዐለው ትልህየ ሱፐር ዲቪዥን 'ኤ' አቅሊም ምግብ ፍንጌ ደንደን ወአልታሕሪር ዐለት። ፈሪቅ ደንደን ሰንበት ንኢሸ እበ ሳደፈዩ ተሰምም ነብረ፡ እትለ ትልህየ፡ 12 መተልህያይ ቁበው ምኑ። እብሊ ሰበብ ህይ፡ ደንደን እትለ ትልህየ ካስ እምበል በዲል ለገብእ እሉ መተልህየት ለአቱ ዲብ ሀሌ፡ ለብዕዳም መተልህየቱመ ዲብ ኢኣካናቶም እግል ለአተልህየም ትቀሰብ። መሰለን መሃጅም ፊልሞን ጥዑምዝጊ ክም መወዝዓይ ሚድያዮ እት



ለአሻሩኩ፡ ፍጹም ኪሮስ እት ከጥ ድፈዕ ባልሳሙ አምሰው።

ምናተ እለ ፈሪቅ፡ እግል ናይ ነፃየት ትልህየ ዲብ መስለሐቱ እግል ልበድለ ቀድረ፡ እት 46፡ ዲብ 62 ወ73 ደቂቀት እበ ዮም ዓመት ምን አልተሕሪር ለአምጸአዉ ሮሚል ዐብዱ ሰለሰ ጎል ሰበት አተው፡ ዕዉታም ካስ ሕርየት ገብአው። እትለ ትልህየ ናይ ደንደን መተልህያይ ሮሚል ዐብዱ ቱ ለሐሰ መተልህያይ ለነሰአ።

ኩሉም ዕዉታም ካስ ሕርየት ምን፡ ዓም ሀይአት አርካን ቅዋት ድፈዕ ኤረትርያ ጀነራል ፍሊጸስ ወልደዮውሃንሴ ወዚር ብእ አሰይድ አብረሃ አሰፊሃ፡ መፈወድ መፈወድዮት ዓዳት ወርያደት ሰፈር ዘመዴ ተኽሊ፡ ሰክርቴር ቀድያት ተንዚም ጀብህት ሸዕብየት እግል ዲሙቅራጥየት ወዐዳለት አሰይድ ዩስፍ ሳይቅ ወመመቅረሓይ ሸቅል አቅሊም ምግብ አሰይድ ዘርኢት ተወልደብርሃን ጀዋእዞም ነስከው።



እብ መናሰበት 32ይ ዲድ ሕርየትን እብ ፈደሬሽን ጅግረ ዐጀላት አቅሊም ምግብ ለትዝመ ጅግራታት ለሐልፈት ሰንበት-ዐባይ እት ሻሬዕ አፍዐበት ባካት ከረሰት ማርያም እብ ውቁል ሸዑር ርዶደት ተመ።

ምን ምንተሐት 23 ሰነት ወዐባይ 55 መትጃግራይ፡ ዲብ 132 ኪሎምትር መሳፈት ትጃገረው። እት ዲብ 44 ኪሎምትር ዱሊት ለዐለት ሾላታ ንቅጠት፡ ዋሉ ጸብሓም ለዐለው ናይ ብሕቶት መትጃግረት ዳዊት ሳሙኤል ወሳይምን ተኽሊብርሃን አወላይ ወካልኣይ እት ልትዐውቶ ዲቤ ሳልሳዮም ለአተ ሚሮን ተሸሚ ቱ።

እት 88 ኪሎምትር እት ገብአት ካልኣይት ሾላታመ፡ አኽሊሉ ገብረሂወት (ሰንበል) ወናትናኤል ሚካኤል (እብ ብሕቶት) እት ልትዐውቶ፡ ተስፎም ዐቅባማርያም ህይ እግል መጅሙዐት ለዐባይ እንዴ ሐማረገ ሳልሳዮም ከጥ ኬደ።

መትጃግረት እት አክር ድቅብ መጃገረት አርአው። ገዲም መትባድራይ ሚሮን ተሸሚ እግል ጅግረ እብ 3፡22፡18 ወቅት እት ልትዐውት ዲቡ፡ ተስፎም ዐቅባማርያም እብ ብሕቶቱ፡ ሄብሮን ብርሃኔ ወሳሙኤል ምስግና ክልኢቶም ምን ፈሪቅ ሰንበል፡ ናሆም መንገሻ (እብ ብሕቶት)፡ ጴጥሮስ መንግስ ምን ኤሪቴል፡ አኽሊሉ አተሸም ምን ደንደን፡ ሳሙኤል ተወልዴ ምን ሰንበል፡ ዓወት ክብሮም ምን አስቤኑ፡ ወሐበን ዐቅባዝጊ ምን ኤሪቴል ህይ ምን 2ይ-10ይ ተርቲብ አተው።

እብ ክእሉል ንቀጥ ህይ፡ ሄብሮን ብርሃኔ ምን ፈሪቅ ሰንበል 2,500

ነቅፊ፡ 2ይ ተስፎም ዐቅባማርያም እብ ብሕቶቱ 2000 ነቅፊ፡ ወ3ይ ሚሮን ተሸሚ እብ ብሕቶት 1,500 ነቅፊ ነስከው። እብ ክእሉል ወቅት ህይ፡ ሄብሮን ብርሃኔ 5,000 ነቅፊ መዳልየት ደሀቤ፡ 2ይ ተስፎም ዐቅባማርያም 3,000 ነቅፊ መዳልየት ወርቅ፡ 3ይ አኽሊሉ ተሸሚ 2,000 ነቅፊ መዳልየት ብርግዝ ትሰርገው። ምን ፍረቅ ህይ ፈሪቅ ደንደን ቱ ካስ ሕርየት ለትሆገል ወመነሰት ለዐርገ።

መትጃግረት ዐጀላት አዋልድ እት ወደያህ ናይ 88 ኪ.ም. ትልህየ፡ አድያም ዳዊት ምን (ደንደን)፡ ቅሳነት ወልዴሚካኤል ወፊሽን ሀይሌ ክልኢተን ምን ሰራይር ሳዋ እት 30 ወ60 ኪሎምትር ዱሊት እለን ለዐለት ናይ ወቅት ወንቅጠት ሾላታ ዲብን እት ልትዐውቱ፡ እግል ጅግራመ ዋልያሁ ሰበት ወዕለዩ ምን መአይደተን ሐምዴ ዛይደት ረክበዩ።

ለጅግረ 13 ኪሎምትር ክም ተርፈቱ፡ ቅሳነት ወልዴሚካኤል ምን ሰራይር ሳዋ ዐጀለት አኬት ምን ከተርፈ፡ ትልህየ ህይ ሸፋገተ ወሰከት። እት መጅሙዐት ዐባይ ለወዴቱ ሰዐይ ሾላታ፡ አድያም ዳዊት ምን ደንደን እግል ወለት ፈሪቅ ዮርዳኖስ ርእሶም እንዴ መርሐት ተወወተት። ብርኽቲ ፍስሃይ ምን ጋላነፍሐ፡ ሮዚና ብርሃኔ ምን አራግ፡ ቅሳነት ወልዴሚካኤል ምን ሰራይር ሳዋ፡ ሚዛን ሀብቱሰላሴ ምን ፈሪቅ ግብለት፡ ፊሸን ሀይሌ ምን ሰራይር ሳዋ፡ አድያም ኢሳቅ ምን ፈሪቅ ግብለት፡ ኤልዳና በረኽት ምን ደንደን፡ ሞናሊዛ አርአያ ምን ፍሪቅ ግብለት ምን 3ይት አስክ 10ይት ለትዐውተዩ ዐለዩ።



እብ ንቀጥ ወቅት ክእሉል፡ 1ይት አድያም ዳዊት 3,000 ነቅፊ መዳልየት ደሀቤ፡ 2ይት ብርኽቲ ፍስሃይ 2,500 ነቅፊ መዳልየት ወርቅ፡ 3ይት ዮርዳኖስ ርእሶም 1,500 ነቅፊ መዳልየት አስራዚ ትሰርገዩ። እብ ንቀጥ ክእሉል አድያም ዳዊት፡ ቅሳነት ወልዴሚካኤል ወፊሽን ሀይሌ ሰልፋያት ሰለሰ ገብአዩ። እት ናይ ፍረቅ ድንዚክ ህይ ፈሪቅ ደንደን ቱ ካስ ሕርየት እብ ዐጀላት ለነሰአ።

ምን መትባድረት ጁንደር ሮቤል ዳዊት (ሰምበል)፡ኤርምያስ ዐቅባይ (ኤሪቴል) ወናትናኤል ጎይትኣም (አስቤኑ)፡ እት አወላይት ሾላታ ንቅጠት ወወቅት ልትዐውቶ ዲብ ህለው፡ ፊልሞን ሐጎስ (እብ ብሕቶት)፡ ማትዮስ ቱድሮስ (ጽንዓት)፡ ወሰዓሬ ሰመሬ ምን ፈሪቅ ኤሪቴል ህይ እት 2ይት ሾላታ ለትዐውተው ቶም።

እት ናይ ደንገበ ሕኒቅ ፍረቅ ህይ፡ ያፌት ሰለሙን (እብ ብሕቶቱ)፡ ኤርምያስ ዐቅባይ (ኤሪቴል)፡ ሮቤል ዳዊት (ሰምበል)፡ ሴም ዐቅባሚካኤል (ደንደን)፡ ዳንኤል ርእሶም ፈሪቅ (ግብለት)፡ ናትናኤል ጎይትኣም ወሴም እዮብ ክልኢቶም ምን (አስቤኑ)፡ ማትዮስ ቱድሮስ (ጽንዓት)፡ ሴም ምሕረትኣብ ደንደን፡ አቤል ተኽሌ ምን ፈሪቅ (ግብለት) አስክ 10ይ ተወወተው።

እብ ክእሉል ኤርምያስ ዐቅባይ ኤሪቴል፡ ሮቤል ዳዊት (ሰምበል)፡ ወዳንኤል ርእሶም ምን ፈሪቅ (ግብለት) ደርብ ሕድ 1,500፡ 1,000 ወ500 ነቅፊ ጀዋእዝ እት ነስከ፡ እብ ክእሉል ወቅት ህይ መድሃኔ ተኽሌ (ግብለት)፡ ኤርምያስ ዐቅባይ (ኤሪቴል)፡ ሮቤል ዳዊት (ሰምበል)፡ 3,000፡ 2,500 ወ1,500 ነቅፊ መዳልየት ደሀቤ፡ ወርቅ፡ ወአስራዚ ነስከው። እብ ፈሪቅ እግል ካልእ ዶል ደንደን ተወወተ። ደንደን እትሊ ናይ ዮም ዓመት ጅግራታት ካስ ሕርየት እብ ጁንደር ሸባን፡ እብ ውላድ ወአዋልድ፡ ዱሉይ ለዐለ ካሳት ሰበት ጃቀፊ፡ ታሪክ ፍንቱይ ሰጁል ሀሌ።

እት ሳምን ኦርቦስ ኦምዕል ሽቅየት ሐለት ዓፍየት ክም ለኦሰኔ ትሸረሐ



እት ብርሃን እብ ለገብኦ ድራሳት እት ሳምን ኦርቦስ ናይ ሽቅል ኦምዕላት ሌጠ ክም ህለ እሊ ህዬ ዲብ ሐሰኖት ሓሰት ዓፍየት ሽቃለ ዐቢ ዶር ክምቡ ትሸረሐ።

ለድራሳት እብ ኑዕየቱ ናይ ሰልፍ እትገብእ ዲብ ብዝሓም ሙሽተርከቱ ለገብኦ። እተ ለትረከበ እንታጅ ህዬ ለዲብ ሳምን ኦርባዕ ዮም ሌጠ ሽቅ ለዐለው ሙሽተርከት ናይ ገርብ ወዐቅል ዓፍየቶም እግል ትሰኔ ክም ቀድረት ትሸረሐ። ለዲብ ሳምን ሰለሰ ናይ ዕርፍ ኦምዕላት ለረከቦ ሽቃለ ናይ ገርብ ሐረከት ለጠልብ ለትፈናተ ነሻጣት እግል ልውደው። ለልትገሰው ዲቡ ሳምንት እግል ለኦንቅሶ ወካፊ ሰባታት ሰኮብ እግል ልርከቦ ክም ቀድረው ሽርሐው። እሊ ህዬ ለትፈናተ መሻክል ዓፍየት ናይ ከረሾት። ሕማም ሰከር፡ ሕማም ኦሰራር ልብ ወተወትር እቡ ናይ መደማዕ መሻክል ክም ልድሕዮ ትወደሐ።

ለባሕሲን እት ሳምን ሰለሰ ዮም ዓረፎት ዲብ ዓም ዓፍየት ሽቃለ ሌጠ እንዴ ኢገብኦ። እተ ነሽጦ ዲቡ መጃል መ ዓቦት እግል ልትሰጅል ክም ቀድረው

ሽርሐው። ህዮም እንዴ ኦትለው ለካፊ ናይ ሳምን ዕርፍ ለረከቦ ኦንፋር፡ ሓሰት ዓቅሎም ሰበት ትትሓሰን ዲብ ሽቅሎም ለህለ እሎም ረቅበት ወፍቲ ክም ለዐቤ ሙቃብል እሊ ህዬ እት ሽቅሎም ፍሬሆም ክም ዘይድ እንዴ ኦትለው ሐበረው። እሊ ወሰኑት ዕርፍ ዲብ ሳምን እግል ሽቃለ ሌጠ እንዴ ኢገብኦ። እግል ለልኦሽቁመ ክመ ናይ ሽቃለ ለመሰል ክምቱ ኦፍህመው።

እሊ ዲብ እሊ ወክድ እሊ እት ዐባዩ መክሰሳት እግል ልትከደም እቡ እሰብዱይ ለህለ ዲብ ሳምን ኦርባዕ ኦምዕል ናይ ሽቅየት። እት ዓኢላት ወዲብ ምግብ ሽቃለ ረሕመት



ኦድሕድ ዲብ ክልቀት ለልትሐመድ ዶር ለኦወቄ ህለ። ዲብ ኦምዕላት ሽቅል እብ ለትፈናተ ኦሰባብ ሳድፍ ለዐለ ኦብከሮት እብ ሰር ክም ኦንቅሰዩ መመቅረሐት ናይለ ድራሳት ወደሐው። እሊ ለልትሐመድ ተቅይር፡ ኦምዕላት ዕርፍ እት ዘይድ መጽኦ ምንገብኦ እት ቅብላቱ ክም ልትወቀል ኦትፋቀደው።

እት ደንገበ ህዬ እሊ ዲብ ለትፈናተ ድወል ድራሳት ገብኦ እሎ ለህለ ኦርእሰ እብ ደረጀት እዲኒ ክም መጃል እንዴ ትረኦ ዲብ ሐሰኖት ዓፍየት ሽቃለ ዐቢ ተቅዩር እግል ለኦምጽኦ ክም ቀድር ኦትፋቀደው።

እግል ኦምር

- ሐቲ በነ እግል ትዕሰስ ለትቀድር ለተክጠቤ ሓዋን ዕዝሎ ሌጣ ቲ።
- ሐርማዝ እግል ልንጠር ኢቀድርኒ።
- ምነ እት እዲነ ለህለ መክሉቃት እግል ወድ ኦዳም ቄትላይት ለትትበህል ክልቀት ሐናኒት ቲ። እለ ሐሸረት እለ ሕማም እንዴ ረፍዐት ሰበት ትገይስ ምን ነፈር ዲብ ነፈር ሕማም እት ተዓዴ እግል ብዙሕ ኦዳም ዲብ ሞት ተበጽሕ ለህሌት ቲ።
- እት ሰነት 1981 ህዳይ መሊከት ዲዮነ ምስል መልክ ቻርለስ 750 ሚልዮን ሽዑብ እብ ገበይ ወሳኢል እጅትማዲ ታበዐዩ። ዲብ ሰነት 1997 ክም ሞተት ህዩ 2.5 ሚልዮን ሽዑብ ሌጠ ታበዐዩ።
- ምን ገርብ ውላድ ኦዳም ለዐበ እሕሳስ ለቡ ቀርበት ቲ።
- መዕጽየት ምድር 39,840 ኪሎ ምትር ቲ።
- እት ምድር ለህለ ሓል ዲብ ፕላኔት ፔኒስ ለህሌት ኦምዕል ትረይመ። ሰበቡ ናይ እለ ፕላኔት ደዊር ሃድእ ሰበት ቲ።
- ኦዳም እግል ሊጊሰን ለኢልትቀደረ ፕላኔታት ሳቱርን፡ ኡራንስ ወነፕቱን ተን። ሰበቡ ሳፕላኔታት ለገብኦ ልግበኦ ይቡስ ሽይ ለኦለበን እብ ጋዛት ሌጠ ለትከወነዩ ሰበት ተን።
- እት ዋሽንግቶን ዲሲ ለህሌት ዋይት ሃውስ 132 ኦፍሱል ወ35 ክምል ከደማት ለልሀይብ ሙስተራሓት(ኦሽቀት) መልክ።
- እት እዲነ ለገደመ ፋንዱቅ ዲብ ጃፓን ለልትረከብ እትገብኦ፡ ፋንዱቅ ኒሲያመ ኦንሰን ከይጃካን ልትበሃል። እሊ ፋንዱቅ እሊ ዲብ ሰነት 705 ትበን።
- ለበዝሐ እርዕዳይ ምድር ለልትርኤ ዲብ ደውለት ኢንዶኔዥያ ቲ።
- ሽዌደን ለበዝሐ ጀዛይር ለበ ደውለት ቲ። ህተን ህዩ 267,570 ጀዛይር ተን።
- ኦሽራቱ ፋርማን ለልትበህል እናስ እብ ብዝሔ ረቅም ቅደሲ (ሪከርድ)፡ ክታብ ሰጅል ዐጃይብ ለሰጅላ ቲ። እሊ ነፈር እሊ ዝያድ 600 ወክድ ሰሜቱ እት ጊከስ ቡክ ኦፍ ሪከርድ እግል ለኦሰጅል ለቀድራ ቲ። ለ200 ህዩ ልሳዕ ኦሰክ እለ ሓፋዝ ዲቡ ህለ። ገሌ ምኑ ብዙሕ ወክድ ዲብ ሐንቴ ማይ ጽንሐት፡ ዲብ ረኦሰክ ቅርረት ሐሊብ እንዴ ረፍዐክ ዐጀለት ዲብ ሰውግ ገበይ ረያም ሄረሮት ክምቱ ተኦምሮ ማሚ?



በህል እመራም

• “ፍክር ጠቢዕያይ ህያብ ረቢቲ። እብ ለትትቀደረነ ህዩ ኦክላቅ እንሳኒ እንዴ ወዴነ እግል ንትነፋዕ እብ ወጅብ።” ማርጋሬት ኦትወድ

• “ለኢትጀረበ እንዴኢኮን ለኢልትቀደር ጋር ኢህላኒ።” ሮጀር ባኒሰተር

• “እብ ሰበት ራትዕ ጋር ኦው ካዋእ ሌጠ ለኢገብኦ። ክም ኦግዶ ዲብ ምህም ጋር ረከዞት ሕፊ።” ለኢትኦመረ

• “ዕዉታም ኦንፋር ምን ብዕዳም ለፈንትዮም ምራድ እንዴኢኮን ኦምር ኦው ቅወት ኢኮን”። ሺንሰ ሳምባርዲኒ

• “ሰኦየት እንተ ኢሐደግካህ ምን ገብኦ ህተ ኢትሐድገካኒ”። ጆርጅ ወንበርግ

• “እት እዲነ ክሉ ተመንያፔ እግል እርከብቱ እንዴ ትቤ እት ፈክር ነፍሰክ ኢትቅሸሽ፡ እግልሚ ነፍሱያት ወምራድ ውላድ ኦዳም ክል ዶል ኦሰክ ለትወቀለት ወለ ሓሰት ለለትቃምት ሰበት ቲ። ናይ ኦክር ምራድከ እግል ትርከብ ህዩ ሰዱድቲ። ሰበት እሊ እብ ለህለ እግልክ በክት ኦግንዖት ለሓሳ ቲ።” ጀይስ ጀይስ ኦልዋት

ሳድስ ወራር እብ ካርቱን



70

ርጉሮ እብ ገዛኪ ሱልጌኦ ለልት መግደሉ ደውለት ዐለት በሂል ክዳድ ዐለ። ኦሎም ሱልጌኦ ለኢኒ፡ በገደሎት ዓይኖም እቲ ሕጻናት ልቦና ጸቲ ገቴም ሙዳ ጌካን ወራቶም ለወዱ። እት ክል ጌካን እት ገጽቶ ቀደፀት ዓይኖም ሕክር እግል ትርከብ ለክድኖ ጸገፍ ለገፍቶ ጽም።